

NO MARKUUSA YOTTINIRI LINJIILA ON NON

*Fii Waaju Annabi Yaayaa ngun
(Mat. 3.1-12; Luk. 3.1-18; Yhn. 1.19-28)*

- ¹ Ko fuddoode Kibaaru Mooyo Iisaa Almasiihu,
 *Bids'o Alla on, nii. ² Wano windori non ka
 deftere annabi *Isaaya:
 «Awa, mido imminde nulaado an on yeeso maa,
 fii ko fertano-maa laawol maa ngol.»
³ «Kaa hawa ko hawa ewnotoodo ka wulaa, wi'a:
 ‹Moyyinee laawol Joomiraado on,
 fewnon juri makko din!» »a
⁴ Yaayaa yaltiti no *loota maande tuubuubuyee
 ka wulaa, e himo waajoo yimbe ben yo be aru, be
 *lootee maande tuubuubuyee fii yo junuubaaji
 mabbe din yaafe. ⁵ Yimbe diiwal *Yahuuda ngal
 fow e hodube *Yerusalaam ben fow ari e makko.
 Be qirritii junuubaaji mabbe din, o looti be
 maande tuubuubuyee ka maayo Yurdayniwol.
⁶ Tawi dolokke Yaayaa on ko leebi ngelooba,
 dattol keeci makko din ko guri. Tawi ko kanu
 e njuuri buruure o naamata. ⁷ Kanko Yaayaa o
 wi'i: «Burdo lan doole on no arude baawo an mo
 mi hewtaa hay ugginagol, firta boggi pade mun.
⁸ Min ko ndiyan mi woni on lootirde, kono kanko
 ko *Ruuhi Seniido on o lootirta on.»

*Fii Lootegol Iisaa e Ndarndegol Makko
(Mat. 3.13-17; Luk. 3.21-22)*

a **1:3** 1.3 Mal. 3.1 e Isa. 40.3

⁹ Ko e on saa'i d'on Iisaa iwi saare Naasirata e nder Jaliilu. Yaayaa looti mo Yurdayniwol. ¹⁰ E saa'i mo o yawaynood ka ndiyan on, o yi'i kammu ngun no udditoo, Ruuhu Allaahu on no tippora e makko wa gabooru. ¹¹ Onsay hawa nanii ka kammu, no wi'a: «Ko an woni Biddo an yidaado on, mido weltor-maa.»

¹² Onsay kisan, Ruuhu Allaahu on nawri Iisaa ka wulaa. ¹³ O woni ka wulaa e nder balde cappande nay, Ibiliisa no ndarndoo mo. Tawi ko kulle buruure d'en o wondi, malaa'ikaabe ben no kurkanoo mo.

*Fii Be Iisaa Adii Noddude ben
(Mat. 4.12-22; Luk. 4.14-15)*

¹⁴ Bay wonii Yaayaa wattaama e joge, Iisaa yahi Jaliilu, tawi himo waajoo fii Kibaaru Moyyo Alla on, ¹⁵ himo wi'a: «Saa'i on hewtii, awa kadi *laamu Alla ngun badike! Tuubee, gomdinon Kibaaru Moyyo on!»

¹⁶ E nder ko o takkotoo *Weendu Jaliilu ndun kon, o yi'i Sim'uunu e Andaraawu mijjniraawo mun on no bugoo *jalaaji ka weendu, ko fii hari ko be yungoobe. ¹⁷ Iisaa wi'i be: «Jokkee lan, mi wattay on yungoobe yimbe.» ¹⁸ Don kisan be acciti jalaaji din, be jokki mo.

¹⁹ No be yaarunoo seeda, Iisaa yi'i Yaaquuba biddo Zabadii on, e Yuuhanna mijan makko kanko Yaaquuba, tawi ben kadi no e nder laana, hibe moyyintina jalaaji mabbe. ²⁰ Kanko Iisaa o noddi be kisan, be acci d'on ben mabbe Zabadii ka nder laana, wondude e yettanoobe golle ben, be jokki mo.

*Fii no Iisaa Radori Jinnawii e nder Neddo
(Luk. 4.31-37)*

²¹ Be yahi Kafernahuum. E *nalaande fowte-teende nden, dun ko aseweere nden, Iisaa naati ka juulirde, woni e jannugol. ²² Ko o jannaynoo kon ɻaldini jamaa on, ko fii himo janniraynoo bawgal, hara wonaa wano jannoobe fii Sariya on ben janniraynoo non. ²³ Hawrondiri neddo no ka juulirde mabbe don mo jinnawii bonngii nangi, on sonki, wi'i: ²⁴ «Hey ko hondun faalanadaa men, an Iisaa oo jeyaado Naasirata? Hara ko mulugol men arandaa? Min mido andi ko hombo wonu-maa, ko a *Seniido mo Alla!»

²⁵ Onsay Iisaa yamiri ngii, wi'i: «Fanku, yaltaa e oo neddo!» ²⁶ Onsay ngin jinnawii yeyi on neddo, ngii yalti e makko, hingii haaca ko tiidi.

²⁷ Fow ɻaldfi, landondiri, be wi'i: «Ko hondun woni du'un? Ko jannde heyre ardunde bawgal. Himo yamira hay jinnaaji bondi din, di doftoo mo!» ²⁸ Onsay kisan, kibaaru fii makko lolli e nder diiwal Jaliilu ngal fow.

*Fii no Iisaa Nawndiri Nawnube buy
(Mat. 8.14-17; Luk. 4.38-41)*

²⁹ Bay be yaltii ka juulirde don, kambe e Yaaquuba e Yuuhanna, be yahi ka galle Sim'uunu e Andaraawu. ³⁰ Tawi esiraawo Sim'uunu suddiido on no waalii nawnaare nguli-bandu. Tun, be wowlani Iisaa fii makko. ³¹ Iisaa badii mo, nangi jungo ngon, immini mo. Nguli-bandu kin yalti e makko, kanko debbo on o woni e kurkanagol be.

³² Bay nibbii, wonii naange ngen mutii, be addani mo jawbe ben fow e be jinna nangi ben fow. ³³ Tawi saare nden fow no mottondiri ka yeeso dambugal. ³⁴ O sellini jawbe buy, tampirnoobe nabbeeli nooneeji nooneeji. O radii kadi jinnaaji buy, o salii di wowla, bay hari hidi andi mo.

*Fii no Iisaa Waajori e nder Jaliilu
(Luk. 4.42-44)*

³⁵ Bimbi nden pande subaka, tawi hentaaki taho, o immii, o yalti, o yaari e nokkuure wulfinnde, o woni e toragol Alla. ³⁶ Onsay Sim'uunu e be o wondunoo ben woni e d'ab'bitugol mo. ³⁷ Bay wonii be yi'i mo, be wi'i mo: «Fow no d'ab'bitude on.»

³⁸ Iisaa jaabii be, o wi'i: «Yahen ka kodooli kawtirdi e d'foo, fii yo mi waajo ton kadi, ko fii ko dun addimmi.» ³⁹ Onsay o yahi e nder Jaliilu fow, himo waajoo e nder juulirde den, radoo jinna.

*Fii no Iisaa Nawndiri mo Damajan
(Mat. 8.1-4; Luk. 5.12-16)*

⁴⁰ Onsay mo damajan ari e makko, jicci, jeeji mo, wi'i: «Si hidon yidi, hidon waawi lan sellinde, mi laaba.»

⁴¹ Iisaa yurmaa mo, fonti jungo mun ngon, meemi mo, wi'i: «Mido yidi, laato selludo laabaa.» ⁴² Don kisan, damajan dan iwi e makko, o selli, o laabi.

⁴³ Iisaa immintini mo kisan e hoore yamiroore sattunde, ⁴⁴ o wi'i mo: «Reeno wota a wowlan d'fun hay gooto, kono yahu hollitoyodaa *yotti-noowo sadaka on, ittaa sadaka fii ko labbinadfaa kon wano Muusaa yamiri non, fii yo dun wonan

be seedee.» ⁴⁵ Bay wonii on nedđo yahii, o woni e wowlugol towna ko wadi kon, e lollingol haa tawi Iisaa waawataa naatude han kadi e saare e kene, kono ko ka baawo ka wuldini o wonaynnoo. Tawi no iwree e cende d'en fow, aree e makko.

2

Fii no Iisaa Imminiri Maaya-Banduujo (Mat. 9:1-8; Luk. 5:17-26)

¹ Balde seedfa bawto d'un, Iisaa arti Kafernahuum, yimbe ben andi wonde himo ka suudu. ² Yimbe duudube moobii d'on, tawi hay ka dambugal alaa ka rewee, Iisaa no yewta be daaluyee on. ³ Yimbe nayo rondii maaya-banduujo, addani mo. ⁴ Nde tawnoo be waawataa mo hewtinde Iisaa sabu duudugol jamaa on, be tufi warnakere nden fewndo ka Iisaa woni d'on, be tippindini on maaya-banduujo e boggi dimbordi din. ⁵ Bay Iisaa yi'ii gomfinal mabbe ngal, o wi'i maaya-banduujo on: «Boobo an, junuubaaji maa din yaafaama.»

⁶ Tawi wobbe e jannoobe fii Sariya on no d'on, hibe muijoo ka berde mabbe: ⁷ «Ko fii hondun oo kan wowliranta nii? Dun ko hoynugol Alla! Ko hombo waawi yaafaade junuubi, ko wonaa Alla?»

⁸ Iisaa andiri kisan ruuhu mun on muijooji mabbe din. O wi'i be: «Ko hondun muijantodson d'un ka berde mon? ⁹ Enee, hakkunde wi'ugol maaya-banduujo *junuubaaji maa din yaafaama* e *immo yettaa boggi-dimbordi maa din, yahaa*, ko hondun e dii doo buri weebude? ¹⁰ Fii no andiron wonde *Bii-Aaden on no mari bawgal

ka aduna doo fii yaafagol junuubaaji», ¹¹ o wi'i jukkudo on: «Mi yamirii ma, immo yettaa boggi-dimbordi maa din, hootaa ka maa.»

¹² On immii d'on kisan yeeso maßbe, o yetti boggi dimbordi makko din, o yalti. Sabu d'un wadi be fow be haawii, tawi hibe mawnina Alla, wi'a: «Hari haa hande men yi'aali sifa d'un!»

*Fii no Lewi Jokkiri Iisaa
(Mat. 9.9-13; Luk. 5.27-32)*

¹³ Iisaa yiltori kadi ka daande weendu. Jamaa on fow ari e makko, o woni e jannugol be. ¹⁴ Wa ko Iisaa feyyata, o yi'i Lewi mo Alfaa no joodii ka yantirde sagalle. O wi'i mo: «Aru jokkaa mi!» Kanko Lewi o immii, o jokki mo.

¹⁵ Bawto d'un, Iisaa joodii fii naamugol ka suudu Lewi, tawi *yantoobe sagalle duudube e junuubankeebe duudube no joodsodi e makko, wondude e taalibaabe makko ben, ko fii hari jokkunoobe mo ben no duudi. ¹⁶ Bay jannoobe fii Sariya on, be fedde *Fariisiyaabe ben, yi'ii himo naamida e yantoobe sagalle ben e junuubanke'en, be wi'i taalibaabe makko ben: «E ko fii hondun oo naamidanta e yantoobe sagalle ben e junuubanke'en?»

¹⁷ Bay wonii Iisaa nanii d'un, o wi'i be: «Hinaa sellube ben hatonjini e pawndoowo, kono ko nawbe ben. Awa min, wonaa noddugol feewube ben mi arani, kono ko junuubankeebe ben.»

*Landal fii Hoorugol
(Mat. 9.14-17; Luk. 5.33-39)*

¹⁸ Tawi taalibaabe Yaayaa ben e Fariisiyaabe ben kajun no hoori. Be ari, be wi'i Iisaa: «Ko fii

hondun taalibaabe Yaayaa ben e be Fariisiyaabe ben kajun hooranta, hara taalibaabe maa ben kan alaa hoorude?»

¹⁹ Iisaa jaabii be, wi'i: «Taw si njaatigiibe jom jomba no waawi hoorude nde hibe wondi e jom jomba? Be gasataa hoorude yeru jom jomba no wondi e mabbe. ²⁰ Aray e saa'i nde jom jomba pottinaa e hakkunde mabbe. Onsay e den baldé don be hooray.

²¹ «Hay gooto yettataa ceelol bagi keso walkira dolokke kiddo. Dun haray kesun d'un naboray fow, wuddere nden burta yaajude. ²² Hay gooto kadi loowataa njaram kesan e nder bootooji guri kidfi. Si hinaa d'un, dan njaram kesan wonay sabu ko feeri din guri. Onsay njaram dan woo, bootooji guri din woo, bona. Kono njaram kesan ko e nder bootooji guri kesi loowetee.»

Landal fii Nalaande Fowteteende nden
(Mat. 12.1-18; Luk. 6.1-5)

²³ E aseweere goo, d'un ko *nalaande fowteteende nden, hari Iisaa no rewude e gese ngawri. E nder yaadu mabbe ndun, tawi taalibaabe makko ben no woocora cawti den gese. ²⁴ Fariisiyaabe ben wi'i mo: «Ko hondun bee wadanta ko dagaaki e nalaande fowteteende nden?»

²⁵ Kono Iisaa jaabii be, wi'i: «Hara on jangaali haa hande ko Daawiuda wadfunoo kon fewndo o weelaa, o faalaa ko o jaama, kanko e yimbe wondunoobe e makko ben? ²⁶ O naati ka nder suudu Alla fewndo oo *yottinoowo mawdo sadaka wi'eteedo Abiiyaataraa, o jaami bireediije weebitaade fii sadaka den, de tawata ko

yottinoobe sadaka ben tun daganinoo jaamugol, o okkori kadi wondube e makko ben.»

²⁷ O wi'i be kadi: «Aseweere nden ko fii yimbe ben taganaa, yimbe ben taganaaka fii aseweere nden. ²⁸ Ko d'un si ko Bii-Aaden on woni jom hay nalaande fowteteende nden.»

3

*Fii no Iisaa Selliniri Maaya-Jungoojo
(Mat. 12.9-14; Luk. 6.6-11)*

¹ Iisaa naatiti kadi ka juulirde. Tawi maaya-jungoojo no nder ton. ² Nde tawnoo *Fariisiyaabe ben no faalaa toopude Iisaa, be ayni mo, hibe ndaara si o nawnday mo e *nalaande fowteteende nden. ³ Iisaa wi'i on maaya-jungoojo: «Immo darodaa ka hakkunde doo.»

⁴ Ontuma Iisaa landii ben: «E hara no dagii ka goddo wada ko moyyi maa ko boni, danda wonkii maa wona sabu makki e *aseweere?» Kono be deyyi.

⁵ Onsay Iisaa ndaari be e hoore himo tikki, aani fii sattere berde maabbe den. O wi'i on neddo: «Fontu jungo maa ngon.» On fonti ngo, jungo makko ngon selli. ⁶ Onsay Fariisiyaabe ben yalti, be woni e fewjodugol e yimbe *Heroodu lando on fii no be warira Iisaa.

Fii no Jamaa on Iwri hen fow, Ari e Iisaa

⁷ Bawto d'un, Iisaa e taalibaabe mun ben yaari ka weendu. Jamaa moolanaado iwrudo ka diiwal Jaliilu e ka diiwal Yahuuda ⁸ e Yerusalaam e Iduumaa e leyde wonirde gada Yurdayniwol den e d'ii baanjeeji Tiiri e Siduuna jokki mo. On jamaa, nanunoodo ko o wonnoo wadude kon

fow ari e makko. ⁹ Onsay Iisaa yamiri taalibaabe mun ben yo be däffban mo laakun fii wota jamaa on biyu mo. ¹⁰ Nde tawnoo himo sellinde yimbe d'uuudube, tampirnoobe nabbeeli ben fow wubbi e makko fii meemugol mo. ¹¹ Kono be jinna nangi ben, si yi'ii Iisaa, jiccotonu yeeso makko, ewnoo, wi'a: «Ko a *Biddo Alla!» ¹² Kono kanko Iisaa o yamirayno din jinnaaji, o tentina wota di fejñin fii makko.

*Fii no Iisaa Subori Sahaabaabe mun ben
(Mat. 10.1-4; Luk. 6.12-16)*

¹³ Bawto dun, Iisaa yawi e fello, o noddi be o faalaa ben, ben ari e makko. ¹⁴ O subii sappoo e dido, o toddii be *sahaabaabe, ko o wonda e mun, ko o immina waajoyoo, ¹⁵ wondude e bawgal fii radagol jinnaaji din. ¹⁶ Ben sappoo e dido, be o todßii, ko Sim'uunu, on mo o jammi Petruusu, ¹⁷ e Yaaquuba mo Zabadii, e Yuuhanna neene-gooto on on (ben be Iisaa jammi Bowanesiisa, ko woni firo d'un ko «bibbe-farjitere»), ¹⁸ e Andaraawu e Filiipu e Bartolomaawu e Matta e Tooma e Yaaquuba mo Alfaa e Taddaawu e Sim'uunu tawdaado e fedde *Zelotiibe ben, ¹⁹ e Yudaasi Iskariiyu, janfoytoodo mo on.

*Fii no Iisaa Jaabori Toope de O Toonaa
(Mat. 12.22-32; Luk. 11.14-23)*

²⁰ Bawto d'un, kanko Iisaa o arti ka suudu. Yimbe ben moobii kadi haa ka tawata kanko e taalibaabe makko ben be waawataa hay naamude. ²¹ Bay sibbe Iisaa ben nanii d'un, be ari nangugol mo, ko fii hari hibe wi'a: «O wilike!»

22 Nde tawnoo jannoobe fii Sariya on, iwrubé Yerusalaam ben, no wi'a: «Balzabuula* no e makko, ko tippude e lando jinnaaji din o woni radforde jinnaaji din.»

23 Onsay Iisaa noddi be, yewtiri be misal, o wi'i: «Ko honno Ibuliisa waawirta radforde Ibuliisa? **24** Si tawii laamateeri liddondirii kayri tigi, haray ndin laamateeri waawataa tabitude.

25 Awa kadi si suudu liddondirii, ndun suudu waawataa tabitude. **26** Si tawii non Ibuliisa

dartike hoore mun tigi, o liddike hoore makko, haray o waawataa tabitude, haray fii makko lannii. **27** Ko fii hay gooto waawataa naatude e

nder galle neddo dolnudo, o mooba keyeeji on din, ado o habbude on neddo dolnudo. Ko onsay doo o waawata moobude ko woni ka suudu on kon. **28** Ka haqiiqa mi andinii on, yimbe

ben yaafante junubaaji din fow e hoyreeji di be hoynata din, **29** kono kala hoynudo *Ruuhu Seniido on hebataa yaafuyee few, haray himo fawtii junuubu haa poomaa.» **30** Ko Iisaa wi'iri be d'un, ko bay hibe wi'ude: «Jinna no e makko.»

Fii Beynguure Iisaa nden

(Mat. 12.46-50; Luk. 8.19-21)

31 Onsay yumma Iisaa e yumma-gootoobe makko ben ari, darii ka yaasi. Be immini goddo ko noddana be mo. **32** Tawi jamaa on no joodii, hundi mo, be wi'i mo: «Yumma mon e yumma-gootoobe mon ben no darii ka yaasi, hibe dabbitude on.»

33 Iisaa jaabii be, o wi'i: «Ko hombo woni yumma an e yumma-gootoobe an ben?» **34** Onsay o layyi gite e hoore joodiibe hundi mo ben, o

wi'i: «E hino yumma an e yumma-gootooße an ben. ³⁵ Ko fii kala wadudo faale Alla on, haray ko on woni yumma-gooto an on e bandiraawo an on e yumma an.»

4

Misal Yettaangal e Remoowo (Mat. 13.1-23; Luk. 8.4-15)

¹ Iisaa woni kadi e waajagol ka daande weendu. Hakkee ko jamaa moobinoodo takko makko on dzuufsi, o bakii e laakun ka nder weendu, o joodii, jamaa on fow woni ka daande weendu. ² O janniri be piiji buy mise. E nder ko o waajotoo kon, o wi'i: ³ «Hedsee, ko remoowo yaltunoo sankugol. ⁴ E nder ko o sankata kon, gabbe goo yani ka dafatal, colli din ari modi de. ⁵ Godde den yani e hoore kaaye, ka leydi dzuudaa, de fudi hepa sabu diewlugol leydi ndin. ⁶ Bay naange ngen yaltii, de sumi de yoori sabu angal ka dadi din sinjoo. ⁷ Godde goo kadi yani ka sooyoore, de fudidi e mayre, sooyoore nden modi de, laatii de rimaali few. ⁸ Godde goo yani ka leydi moyyiri. De fudi, de mawni, de sawti, cawti goo gabbe cappande tati, cawti goo cappande jeegoo, cawti goo teemedere.»

⁹ E hoore dün, o wi'i: «Mo no mari noppi nanirdfi yo nanu!»

¹⁰ Bay lutti mo kanko tun, dowitzunoobe mo ben e *sahaabaabe sappoo e didoobe ben woni e landagol mo firo dee mise. ¹¹ O wi'i be: «Onon on yedaama gundoo *laamu Alla ngun, kono bee ka yaasi, be wowlirante fow mise, ¹² fii yo be

ndaaru, hara be yi'ataa, yo be nanu, hara be faamataa, fii wota be tuubu, junuubaaji maßbe ðin yaafee.»^b

¹³ O wi'i be kadi: «On faamaali ngal misal dfoo? Ko honno non faamiroyton deya mise fow?

¹⁴ Remoowo on sanki awdi ndin, dun ko daalol ngol. ¹⁵ Wobbe no wa'i wa nde awdi sankaa ka datal ka daalol ngol sankaa ñon. Be nana ngol tun, Ibuliisa ara, itta daalol sankaangol e maßbe ngol. ¹⁶ Wobbe goo kadi no wa'i wa nde awdi sankaa ka kaaye. Nde be nani daalol ngol, be jaba ngol hepa e nder weltaare. ¹⁷ Kono be alaa ñadi, ko fii hinaa be tabitube. Nde satteendeeji maa cukkeede aroyi sabu jokkugol maßbe daalol ngol, be tertoto kisan. ¹⁸ Wobbe goo kadi no wa'i wa nde awdi sankaa ka sooyoore. Ko ben woni nanoobe daalol ngol, ¹⁹ kono ngol ronka rimude e mabbe, ko fii haray ngol modiraama anndeeji aduna e ñayniro jawle e faaleeji ngurndan goo. ²⁰ Beya ben non no wa'i wa nde awdi sankaa ka leydi moyyiri. Ko ben woni nanoobe daalol ngol, jaba, ngol rima e mabbe, wobbe goo laabi cappande tati, wobbe goo laabi cappande jeegoo, beya ben laabi teemedere.»

*Misal Yettaangal e Lampu
(Luk. 8.16-18)*

²¹ O wi'i be kadi: «Taw si hara lampu ko ka wirnii wadetee maa ko e ley danki? E hara hinaa ka kene? ²² Ko fii alaa ko suudii ko feenataa, awa kadi kala gundoo ko sakkitorta ko feenugol. ²³ Mo no mari noppi nanirdi yo nanu!»

²⁴ O wi'i be kadi: «Wattanee yiila e ko hedfotodon kon. Ko fii ko sariyaare nde etirdon nden etirantedon, beyditanedon kadi. ²⁵ Ko fii ko mardo beydantee, kono mo maraa on jabitante hay yeru ko o mari kon.»

Fii no Laamateeri Alla ndin Ebbindiriraa e Awdi

²⁶ O wi'i be kadi: «Laamu Alla ngun no wa'i wa nde neddo yetti awdi, sanki ka leydi. ²⁷ Woni o daanii woo, o daanaaki woo, jemma e palorma awdi ndin fuday, njanda, hara ko no o andira. ²⁸ Leydi ndin fudinanay hoore mun, ndi adora pudol ngol, hikka cawtol ngol, si gabbe ñen kadi moyyinoo moyya ka cawtol. ²⁹ No gabbe ñen fendiri, wortowal ngal no yetteede, ko fii haray baagol ngol fewndike.»

Fii no Laamateeri Alla ndin Ebbindiriraa e Bene

(Mat. 13.31-32; Luk. 13.18-19)

³⁰ O wi'i kadi: «Ko hondun ebbindirten e laamu Alla ngun, maa ko misal hongal hollirten dñun? ³¹ Hingu wa'i wa abbere bene, kon ko buri fandude e ko aawetee kon fow ka leydi. ³² Kono si wonii nde aawaama, nde hawtoo, nde njanda, nde bura ko aawetee e naakoo kon fow, nde wada caldi njani haa ka tawata colli ñin ka weeyo waaway hodude ka ley ñowdi makki.»

³³ Ko mise buy wa'itaynoode nii o yewtiraynoo be daaluyee on, noone no be waawiraynoo faamirde. ³⁴ O yewtirtaano be si wonaa mise, kono si wonii ka weddii o sifantono fow taalibaabe makko ben.

*Fii no Iisaa Deeyiniri Waabiliire nden
(Mat. 8.23-27; Luk. 8.22-25)*

³⁵ Nden jande kiikiide Iisaa wi'i be: «Lumbiten gada.» ³⁶ Be acciti jamaa on, be nabori Iisaa ka weendu e nder laakun kun o wonnoo e mun kun, laade goo dowti be. ³⁷ Tun waabiliire tiifunde wondunde e hendlu woni e wifugol, tawi morloode ndiyan d'en no piyoo e laakun kun, kun heewa ndiyan. ³⁸ Tawi kanko Iisaa himo awlii ngawlu, daanii baawo. Be findini mo, be wi'i: «Karamoko'en, e on kippataa fii ko men woni mulude kon?»

³⁹ O immii, o tonjani hendlu ndun, o wi'i ndiyan dan: «Deeyu, fankaa!» Hendlu ndun deyyi, deeyaango tiifungo wadi. ⁴⁰ E hoore d'un o wi'i be: «Ko fii hondun hulandon? E hara on alaa gomdfinal haa jooni?»

⁴¹ Be huli kulol tiifungol, be wi'indiri: «Ko hombo woni oo? Ko fii hay keneeli din e baharu on doftoto mo!»

5

*Fii no Jinnanoobe Dido Selliniraa
(Mat. 8.28-34; Luk. 8.26-39)*

¹ Be hewtoyi gada weendu ndun, d'un ko e ndii leydi bee Gadariyankoobe. ² Nde Iisaa tippornoo ka laana, aaden mo jinna woni e mun iwri ka genaale, ari yeeso makko. ³ Tawi ka on mari hodo ko ka genaale. Hari hay gooto waawataa mo habbude hande kadi, hay si tawii non ko jolokooje. ⁴ Ko fii hari soono woo o dumbete, o jolkee, o taya jolokooje d'en, o hela dumbirde den. Tawi hay gooto waawataa mo dahude.

⁵ Tawi jemma e palorma ko ka genaale e ka pelle o tabiti, e himo sonka, barmintinora kaaye.

⁶ No o haccornoo Iisaa ka wodđi, o dogi, o ari, o jicci yeeso makko, ⁷ o ewnii ko tiidi, o wi'i: «Ko hondun faalanadfaa lan, an oo *Bidđo Alla Jom Bural? Mi torike ma fii Alla, wota a lettan!» ⁸ Ko fii hari Iisaa no wi'ude ngii: «Yaltu e oo nedđo, yo jinnawii!»

⁹ Onsay Iisaa landii mo: «Ko honno innetedfaa?»

On jaabii: «Ko 〈Konu〉, ko fii meden d'uudfi!»

¹⁰ Awa kadi hidī jeejaynoodo on fota fii wota o yaltin di leydi ndin.

¹¹ Tawi wuro kose moolanaango no ooraynoodo ka binde falo d'son. ¹² Onsay jinnaaji d'in jeeji Iisaa, hidī wi'a: «Nawru men e d'i koseeji fii no men naatira e nder majji!» ¹³ O newnani d'i cfun. Jinnaaji d'in yalti e on nedđo, d'i naati e nder d'in koseeji. Onsay koseeji d'in giddi ka falo, d'i unoyii ka weendu, d'i yoolii, tawi ko wa d'i guluuji d'idi.

¹⁴ Onsay ornaynoobe d'i ben dogi, be fillitoyii dun ka saare e ka fulawaaji, yimbe ben ari yi'ugol kon ko wadi. ¹⁵ Bay be arii e Iisaa, be yi'ii on mo konu jinna wonnoodo on kon e ko wadi e koseeji d'in kon. ¹⁶ Yi'unoobe ko wadi kon fillitanii be ko wadi e hoore jinnanoodo on kon e ko wadi e koseeji d'in kon. ¹⁷ Onsay be woni e jeejugol Iisaa fii yo o yaltu ka leydi mabbē.

¹⁸ Wa ko kanko Iisaa o yawata ka laana, jinnanoodo on torii mo yo o accu be wonda.

¹⁹ Laatii Iisaa newnanaali mo, kono o wi'i mo:

«Yahu ka mon, d'un ko ka sibbe maa ben,

fillitanodaa be ko Joomiraado on wadan-maa kon fow e ko honno o yurmira-maa.» ²⁰ Onsay o yahi, o woni e fillitagol e nder *Dekapooli ko Iisaa wadani mo kon fow. Hediibe mo ben fow ηaldfi.

*Fii no Iisaa Wurnitiri Jiwo, O Sellini Debbo
(Mat. 9.18-26; Luk. 8.40-56)*

²¹ Bay Iisaa yetti laana kan, lumbitoyii gacsa, jamaa moolanaado ari, moobii takko makko kadi ka daande weendu. ²² Tun goddo e hooreebe juulirde nden wi'eteedo Yaayirusu, ari. Bay o yi'ii mo, o yani e ley koyde makko. ²³ O torii mo, o jeeji e hoore himo wi'a: «Biddo an jiwo on no e daande mayde. Seenee fawon sookeeje mon d'en e makko fii no o dadira, o wuura.» ²⁴ Onsay Iisaa yaadi e makko.

Jamaa csiufigudo jokki mo, bittiri mo cende d'en fow. ²⁵ Tawi kadi debbo no d'on, hebii duubi sappoo e didi himo soncaade. ²⁶ Tawi o tampii fota e juude pawndoobe siuidube, awa kadi o ittii ko o jogii fow, d'un nafaali huunde, kono paw ngun burtu. ²⁷ Bay o nanii fii Iisaa no wowlee, o ari e jamaa on, o wontiri baawo Iisaa, o meemi dolokke makko on, ²⁸ ko fii hari kanko debbo on himo mijoo: «Si mi waawii tun meemude conci makko d'in, mi ndikkay.» ²⁹ E on saa'i tigi ko o soncotonoo kon tayi, o andi ka bandu makko wonde o ndikkii paw makko ngun.

³⁰ Tun Iisaa andi wonde bawgal makko ngal gollii godfun. O yeeyitii e hakkunde mbatu ngun, o wi'i: «Ko hombo meemi conci an d'in?»

³¹ Taalibaabe makko þen wi'i mo: «Ndaaree jamaa ko bitti on, si hidon maaka «ko hombo meemi lan?» »

³² Onsay o layyi gite takko makko fii yo o yi'u wadudo d'un on. ³³ Nde tawnoo debbo on no andi ko feyyi e makko kon, o huli, o diwni, o ari o yani e ley koyde Iisaa, o wowlani mo goonga on fow. ³⁴ Kono Iisaa wi'i mo: «Jiwo an, gomdfinal maa ngal sellinii ma. Yahu e hoore buttu, sellaa naw ngu wondudaa ngun.»

³⁵ Wa fewndo ko Iisaa yewtata d'un, woþþe e jeyaaþe ka hooreejo juulirde nden iwi ton ari, wi'i mo: «Jiwo maa on maayii. Ko fii hondun sonjantaa oo karamokoojo?»

³⁶ Kono bay Iisaa nanii d'un, o wi'i hooreejo juulirde nden: «Wota a hulu, gomdfin tun.»

³⁷ Kono laatii Iisaa jabaano hay gooto dowta mo, si hinaa Petruusu e Yaaquuba e Yuuhanna neene-gooto Yaaquuba on. ³⁸ Bay be hewtii ka hooreejo juulirde nden, kanko Iisaa o yi'ii jiiboldu ndun e ko yimþe þen wullata fesa ko tiidi kon. ³⁹ O naati, o wi'i be: «Ko hondun woni nduu jiiboldu e dii gondi? Ko fii jiwo on maayaali, o ðaani.» ⁴⁰ Be jali mo.

Onsay o yaltini be fow, o yetti ben jiwo on e yumma jiwo on, wondude e dowtunoobe mo þen, be naati ka jiwo on woni d'on. ⁴¹ O nangi jungo jiwo on, o wi'i mo: «Talitaa kumi!» (ko woni firo d'un: «Mi wi'ii ma: «Jiwo, immo!» ») ⁴² Don kisan jiwo on immii, o woni e jindugol, ko fii hari ko mo o duufi sappoo e didi. Kaawee mawðo heþi be. ⁴³ Iisaa yamiri be, tentini, wota

hay gooto andu dfun. O wi'i be yo be okkor jiwo on ko o jaama.

6

*Fii no be Naasirata ben Salori Gomdinde Iisaa
(Mat. 13.53-58; Luk. 4.16-30)*

¹ Onsay Iisaa iwi d'on, o yahi ka leydi makko. Taalibaabe makko ben kadi jokki mo. ² Bay wonii *nalaande fowteteende nden hewtii, d'un ko *aseweere nden, o woni e waajagol ka juulirde. Tawi d'uudube no hedotonoo mo. Be ηaldī, be wi'i: «Dun ko honto iwrani oo? Ko hongu woni nguu faamu ngu oo yedaa, e ko honno sifa d'ii kaawakeeji moyyi woni wadirde e juude makko? ³ E hinaa minisiyeejo on nii? Hinaa kanko woni biddo Mariyama on? E hara neene-gootoobe makko ben hinaa Yaaquuba e Yuusufu e Yuudu e Sim'uunu? E hinaa bandiraabe makko ben no wondi e men doo?» Dun hadī be gomdingol mo.

⁴ Kono Iisaa wi'i be: «Annabaajo ko ka leydi mun tun e ka musidal mun e ka beynguure mun yawaa.» ⁵ Laatii o waawaali wadsude d'on kaawake woo, si hinaa *fawugol juude e hoore nawnube goo, sellina be. ⁶ Kono o ηaldī sabu angal gomdinal mabbe ngal. O jindi e kodooli hundudi d'on din, o janni.

*Fii no Iisaa Nulirnoo Sahaabaabe mun ben
Sappoo e Dido
(Mat. 10.2-20; Luk. 9.1-6)*

⁷ Onsay o noddi sappoo e didoobe ben, o woni be e imminirgol dido dido e hoore jonnugol be bawgal radagol jinnaaji din. ⁸ E hoore dun,

himo yamiri be wota be yettu hay huunde ko be yooboo, si hinaa tuggordu wooturu tun: hinaa bireedi, hinaa bonfooji, hinaa yettugol dattol mbuudi. ⁹ Kono o wi'i be: «On wattoto pade, kono wota on borno dolokkaaji didi.» ¹⁰ O wi'i be kadi: «Kala suudu ndu naatoydon e mun, weeree don haa nde hidon iwa e nden nokkuure woo. ¹¹ Kono si woodii e saare nde yimbe ben jabaali on, hedii on, nde hidon yalta don woo, honkee mballaari teppe mon den fii yo dun wonan be seedee ella maabbe on.»

¹² Be yahi be waajoyii fii yo yimbe ben tuubu. ¹³ Tawi hibe radoo jinnaaji duudufi, juura nebbe e jawbe duudube, sellina be.

*Fii Mayde Annabi Yaayaa nden
(Mat. 14.1-12; Luk. 9.7-9)*

¹⁴ Heroodu* lando on humpitii dun. E hoore dun tawi innde Iisaa nden lolpii, hibe wi'a: «Yaayaa lootaynoodo maande tuubuubuyee on immitike e hakkunde maybe ben! Ko dun wadi si himo mari bawgal wadugol kaawakeeji moyyi.»

¹⁵ Tawi wobbe ben no wi'a wondema ko liliiya, beya ben kadi no wi'a ko annabaajo wa goddo e annabaabe hibbe ben.

¹⁶ Kono bay Heroodu nanii dun, tawi himo wi'a: «Ko Yaayaa, on mo mi wadi haa daande mun tayaa. Ko on woni ko immitii!»

¹⁷ Ko fii hari kanko Heroodu tigi o nangiino Yaayaa, o jolkii mo, o wadii e kaso, sabu oo debbo wi'eteedo Heroodiyya mo kanko Heroodu o yetti, tawi-le on ko beyngu Filiipu, yummagooto makko on nun kanko Heroodu, ¹⁸ sabu ko

Yaayaa wi'unoo mo kon wonde daganaaki mo ka o yetta beyngu yumma-gooto makko on. ¹⁹ Tawi oo debbo wi'eteedo Heroodiiya no haamanii mo kanko Yaayaa, no faalaa mo warude, kono o waawaali, ²⁰ ko fii hari Heroodu no huli Yaayaa, sabu ko o andi kon on ko neddo feewudo laabudo, jaka himo hiwunoo mo. Tawi himo yidfunoo hedfagol mo, fii kala si o nanii himo yewta, o jibotono fota.

²¹ Kono pande goo kanko Heroodiiya o hebi sabu weebando mo e nder ngal caatal, ngal Heroodu wadani be o lammini ben e hooreebe suufaabe makko ben e hooreebe ben Jaliilu fii anditugol jibineede makko kanko Heroodu ngol. ²² E nder d'un, jiwo Heroodiiya on naati, ami, o weli Heroodu e saatinaabe ben.

Onsay lando on wi'i jiwo on: «Toro lan kala ko faaladfaa, mi wadante.» ²³ O wadani mo ndee woondoore doo, o wi'i: «Kala ko toridfaa mi, mi wadante, hay si ko feccere laamateeri an ndin.»

²⁴ Kanko jiwo on o yalti, o landii yumma makko: «Ko hondun mi landotoo?»

Neene makko jaabii mo wi'i: «Ko hoore Yaayaa lootoowo maande tuubuubuyee on.»

²⁵ Kanko jiwo on o hawjiti kisan, o naati, o ari e lando on, o wi'i: «Midoo faalaa yo a jonnan doo hoore Yaayaa lootoowo on kisan, hara hinde tumbaa e miran!»

²⁶ Onsay lando on aani, kono sabu woondooje makko den, e be o saatinnoo ben, tawi o faalaaka mo salanaade. ²⁷ O immini kisan suufaajo, o yamiri mo addoygol hoore Yaayaa nden. Suufaajo on yahi, tayoyi hoore Yaayaa nden ka

kaso, ²⁸ o addi hoore nden e nder miran, o jonne jiwo on. Jiwo on kadi jonnogi nde yumma mun. ²⁹ Bay wonii dun andike, taalibaabe Yaayaa ben ari, yetti furee makko on, be surroyi.

*Fii no Iisaa Namminiri Yimbe Guluuje Njowo
(Mat. 14.13-21; Luk. 9.10-17; Yhn. 6.1-14)*

³⁰ Sahaabaabe* ben mottondiri takko Iisaa, be sifanii mo ko be wadi kon fow e ko be janni kon. ³¹ Onsay o wi'i be: «Aree ka weddii, hara ko ka wuldfini, fowtodon seedfa.» Ko fii hari yimbe buy no wada yaha ara, tawi Iisaa e taalibaabe mun ben alaa hay feere no be jaamira.

³² Onsay kambe tun be bakii e laana fii yahugol e nokkuure wulfinnde. ³³ Buy yi'i hibe yaha, anditi be. Yimbe ben ka ca'e fow dogi, aditoyii be ka be yahaynoo ton. ³⁴ Bay wonii kanko Iisaa o tippike ka laana, o yi'i jamaa d'uuufsuso, o yurmaa be, ko fii hari hibe wa'i wa baali di alaa ngaynaako. Onsay o woni be e jannugol piiji d'uuufsudi.

³⁵ Nde tawnoo nallal ngal poodee, taalibaabe makko ben badii mo wi'i: «Ndee nokkuure ko wulfinnde, awa kadi nallal ngal poodee. ³⁶ Accitee be, be yaha ka fulawaaji e ka kodooli kawtirdi e doo, be dabboya ko be jaama.»

³⁷ Iisaa jaabii be wi'i: «Onon tigi okkoree be ko be jaama.»

Kono be wi'i mo: «E hara men yahay, men soodoya bireedi yero *dinaruuji teemedde didi, men okkora be ko be jaama?»

³⁸ Onsay o jaabii be, o wi'i: «Ko bireedijje jelu mardon? Yahee ndaaroyon.» Be yahi, be

humpitoyii, be ari, be wi'i mo: «Ko bireedijje jowi e liyyi didi.»

³⁹ Onsay o yamiri be yo be joddfinir be fow mojobe mojobe ka hoore hudo hecco. ⁴⁰ Be joddfiniri be safeeji safeeji, di yimbe teemedere, e di yimbe cappande njowo. ⁴¹ O yetti bireedijje d'en jowi e liyyi din didi, o banti gite d'en, o fewtini ka kammu, o du'ii. Onsay o tayiti bireedi on, o woni e jonnugol taalibaabe ben ko hewtina jamaa on. O senditi kadi liyyi din e hakkunde fow. ⁴² Fow jaami haa haari. ⁴³ Be moobiti debeeje sappoo e didi tew kunte bireedi e liyyi. ⁴⁴ Ben jaamunoobe on bireedi hari ko be worbe guluuje njowo.

Fii no Iisaa Seppiri ka hoore Ndiyan
(Mat. 14.22-33; Yhn. 6.16-21)

⁴⁵ Bawto d'un kisan, o yamiri taalibaabe makko ben yo be bako ka laana, be hikkoo yeeso makko, be lumba gada, telen Bayti-Sa'iida, e nder ko o yiltata jamaa on kon. ⁴⁶ Bay o waynondirii e mabbe, o yawi ka fello fii toragol Alla.

⁴⁷ Bay nibbii, tawi laana kan no ka tumbo weendu, kanko Iisaa tun himo ka leydi. ⁴⁸ O andi hibe e nder satteende fota e nder awyingol laakun kun, ko fii hari hibe tiindondiri e hendi ndun. Wa fewndo ka subaka, o sutori e mabbe, himo seppa ka hoore ndiyan, tawi himo faalaa be feyyitaade. ⁴⁹ Bay taalibaabe ben yi'ii himo seppa ka hoore ndiyan, be sikki ko mbeelu, be sonki, ⁵⁰ ko fii hari be fow be yi'ii mo, be hulii.

Iisaa wi'i be kisan: «Hoolee, ko min nii! Wota on hulu!» ⁵¹ Onsay o yawi ka laana takko mabbe,

hendu ndun deyyiti. Be fow be ḥaldī fota, ⁵² ko fii hari be faamaali kaawake moyyo waduso on ka bireediije, bay hari berde mabbe den no uddi.

⁵³ Bay be gaynii lumbude weendum, be hewtii Jaani-Saarata, be saani laana kan. ⁵⁴ Bay be tippike ka laana, yimbe ben anditi kisan Iisaa. ⁵⁵ Be dogi e diiwal ngal fow, be woni e addangol mo nawnube e hoore boggi-dimbordī, kala ka andanoo himo d'on. ⁵⁶ Kala ka o naatunoo, woni ka kodooli, woni ka ca'e maa ka fulawaajī, be addayno nawnube ben ka fottirde, be jeeja mo yo o newnan be tun be meema kombol dolokke makko on. Meemunoobe ngol ben fow ndikki.

7

Fii Fariisiyaabe ben e Aadaaji mun dīn (Mat. 15.1-9)

¹ Onsay *Fariisiyaabe ben e wobbe e jannoobe fii Sariya on, iwrunoobe Yerusalaam, moobii takko Iisaa. ² Be yi'i wobbe e taalibaabe makko ben no jaamira juude tuunude, e maanaa de soodaaka. ³ (Tawi-le Fariisiyaabe ben e *Yahudiyankeebē ben fow jaamataano si soodaaki haa laabi, ko fii hibē jogitinoo naamuujī mawbe mabbe ben. ⁴ Si be iwtiino ka fottirde, be naamiino woo nde be labbinii. Hibē joginoo kadi naamuujī buy di be wadaynood, wano lawyugol jardukoy koy e payande d'en e miranji dīn.)

⁵ Onsay Fariisiyaabe ben e jannoobe fii Sariya on landii mo kanko Iisaa, be wi'i: «Ko hondun hadi taalibaabe maa ben jokka naamuujī mawbe

ben? E ko fii hondun be jaamata, hara be soodaaki?»

⁶ Iisaa jaabii be wi'i: «Isaaya* no haalunoo ko Alla longini mo fii mon moyya, yo faasiqiibe, wano windori non:

«O jamaa ko ka toni mun woni lan mawninde, kono berde mabbe den no woddondiri e an fota.

⁷ Ko e nder meere be woni lan rewude, janndeeji di be woni jannude din ko di yimbe ben sinci.»^c

⁸ «Hidon teraadje yamirooje Alla den, jogitoo naamuuji yimbe ben.»

⁹ O beyditi, o wi'i: «Hidon bugitoo few yamirooje Alla den fii huutorgol naamuuji mon din, ¹⁰ ko fii Muusaa no wi'i: ‹Teddin yumma maa e ben maa›, awa kadi: ‹on mo hudfi ben mun maa yumma mun donkinirte mayde.› ¹¹ Kono onon hidon wi'a goddo no waawi wi'ude ben mun maa yumma mun: ‹Mi yedii Alla ko mi nafiraynoo on kon.› ¹² E nder wi'ugol mon dun, on accataa ontigi wadana ben mun maa yumma mun hay huunde han kadi. ¹³ Ko nii wondon mehindinirde daaluyee Alla on tippude e naamu mon mo sincanadon on. Hidon wada kadi piiji djuudufi goo nandudi e mun!»

*Fii ko Tuuninta Neddo kon
(Mat. 15.10-20)*

¹⁴ Iisaa nodditi kadi jamaa on, o wi'i be: «Hedsee lan on fow, faamon. ¹⁵ Hay huunde alaa e kene naataynde e neddo, tuunina mo, kono ko

^c **7:7** 7.7 Isa. 29.13

ko yaltata e nedđdo kon tuuninta mo. ¹⁶ Mo no mari noppī nanirdī yo nanu!»

¹⁷ Bay wonii o naatoyii e suudu ka wodđitii jamaa on, taalibaabe makko ben landii mo fii ngal misal. ¹⁸ O wi'i be: «E jaka, onon kadi ko on be alaa faamu? E on andaa hay huunde alaa e kene naataynde e nedđdo, waawaynde tuuninde mo? ¹⁹ Ko fii d'un naatataa ka bernde makko, kono ko ka reedu makko yaarata, d'un yaltinoyee ka baawo.» (Tawi ko o wi'i don ko wonde naameteeji d'in fow no laabi.)

²⁰ O wi'i kadi: «Ko ko yaltata e nedđdo kon woni ko tuuninta mo, ²¹ ko fii, ko e nder bernde nedđdo miijooji bondī yaltata, kajun e cagayaagal e nguyka e waru-hoore e ²² jeeno e miile e hunyeendi e janfa e jiibaare e nawliigu e hoyre e mawnintinaare e njofoyaagal. ²³ Dii piiji bondī fow ko yaltaydī e nder nedđdo, tuunina mo.»

*Fii no Gomđinal Debbo Feniisiyankeejo
Bangiri*
(Mat. 15.21-28)

²⁴ Bay kanko Iisaa o iwii e nden nokkuure, o yahi e ndii leydi ndee saare Tiiri. O naati don e suudu, tawi o yidaa hay gooto anda. Kono o waawaali suudaade, ²⁵ ko fii hari debbo mo tawata jinna no nangi biddo mun jiwo, naniino fii makko kanko Iisaa no wowlee, o ari, o yani e ley koyde makko. ²⁶ Tawi on debbo ko *Gereekiyanteejo, mo iwdi mun woni Fenisi, d'un ko e nder Sirii. O torii mo radfanagol mo jinnawii wongii e jiwo makko on ngin.

²⁷ Iisaa wi'i mo: «Accu taho faybe ben haara, ko fii moyyaa ka bireediije paykoy koy yettee, buganee bareeji din.»

²⁸ Debbo on jaabii mo: «Hiiyii, Koohoojo, kono hay bareeji wondi ka ley taabal din jaamay ko paykoy koy samminta kon.»

²⁹ Onsay kanko Iisaa o wi'i mo: «Sabu ngol kongol, yahu, jinnawii ngin yaltii e jiwo maa on.»

³⁰ Bay wonii kanko debbo on o naatoyii ka suudu makko, o tawi biidso makko jiwo on no waalii ka danki, awa kadi jinnawii ngin yaltii e makko.

Fii no Iisaa Selliniri Pahidudo-Mbobidi

³¹ Onsay Iisaa iwi e ndin leydi Tiiri, o tayiti leydi Siduuna ndin, o artiri *Dekapooli telen ka *Weendu Jaliilu. ³² Be addani mo pahidudo-mbobidi, be jeeji mo *fawugol juude den e hoore on, sellina mo. ³³ O nabi mo sera, ka woddfitii jamaa on, o ukki kolli makko din ka nder noppi nawnudo on, o tutti, o meemini denngal on ngal. ³⁴ Onsay o banti gite makko den, o fewtini ka kammu, o tayiti foofaango, o wi'i: «Efataa!» (Dun no firi: «Uddito!») ³⁵ Tun kisan noppi makko din udditii, denngal makko ngal kadi bowri, o woni e wowlugol no feewiri.

³⁶ Iisaa yamiri be wota be wowlan dun hay gooto, kono, ko no o hadirnoo be woo, be burtiraynood lollinirde. ³⁷ Be woni e nder ɲalaw tiidsudo, be wi'i: «Ko o wadsata kon fow ko ko moyyi. O naninay hay pahidube ben, o wowlina kadi mbobidube ben!»

8*Fii no Iisaa Namminiri Yimbe Guluuje Nayo
(Mat. 15.32-39)*

¹ E d'en balde f'on, nde tawnoo jamaa moolanaado kadi no don, awa kadi alaa ko be naama, Iisaa noddi taalibaabe mun ben, o wi'i:
² «Oo jamaa no yurmammi, wonii nii balde tati hibe wondi e an, be alaa ko be naama. ³ Si mi yiltii be ka maßbe hibe weelaa, be lo'ay ka laawol, ko fii wobbe e maßbe ko ka woddfi iwi.»

⁴ Kono taalibaabe makko ben jaabii mo, wi'i: «Ko honto men hebata bireedi e ndee nokkuure wuldinnde ko haarata bee?»

⁵ Iisaa landii be, wi'i: «Ko bireedijje jelumardon?»

Be jaabii mo, be wi'i: «Ko de jeedidfi.»

⁶ Onsay o torii jamaa on joosagol ka leydi, o yetti bireedijje d'en jeedidfi. Bay o jarnii Alla, o tayiti, o jonni taalibaabe makko ben fii yo be hewtin jamaa on, kambe kadi be hewtini. ⁷ Tawi hibe marnoo kadi liyyi seeda. Dun kadi, bay Iisaa gaynii du'aade, o wi'i yo be hewtin be. ⁸ Be naami haa be haari, moabitaa debeeje jeedidfi tew ko lutti. ⁹ Tawi ben ko wa be worbe guluuje nayo. Bawto d'un Iisaa yilti be. ¹⁰ Ontuma o bakodi e taalibaabe makko ben e laana ndiyan, o yahi e ndii leydi Dalmanuuta.d

*Fii no Iisaa Tororaa Hollugol Maande
(Mat. 16.1-4)*

¹¹ Onsay *Fariisiyaabe ben ari, fuddfii yeddondirde e Iisaa. Be landii mo fii ndarndagol

d **8:10** 8.10 «*Dalmanuuta*» no wi'ee kadi «*Magaduuna*».

mo, yo o hollu be maande iwrunde ka kammu. ¹² Iisaa tayiti foofaango tiifungo, o wi'i: «Ko fii hondun nguu jamaanu landorta maande? Ka haqiqiqa mi andinii on, nguu jamaanu jonnaatake maande.» ¹³ Onsay o acci be d'on, o bakii kadi e laana fii lumbugol gada.

*Fii ‹Lewen› Fariisiyaabe ben e mo Heroodu Lando on
(Mat. 16.5-12)*

¹⁴ Laatii taalibaabe ben yejjiti yettorde bireedi, tawi ko bireediwal gootal pet be mari ka nder laana. ¹⁵ Iisaa yamiri be d'sundfoo, o wi'i: «Reenee fota e lewen Fariisiyaabe ben e lewen *Heroodu on.»

¹⁶ Taalibaabe ben wi'indiri: «Ko o wi'iri d'un, ko fii en maraa bireedi.»

¹⁷ Iisaa andi ko be wi'i kon, o wi'i be: «Ko fii hondun wi'andson ko bay on maraa bireedi? E on andaali, e on faamaali kadi? E hara berde mon d'en sattii? ¹⁸ Hidon jogii gite, e hara on yi'ataa? Hidon mari noppo, e hara on nanataa? ¹⁹ Fewndo mi tayiti bireediije d'en jowi fii yimbe ben guluuje njowo, e on anditaali ko debeeje jelu heewude tew kunte bireedi artirnodon?»

Be jaabii mo: «Ko de sappoo e didi.»

²⁰ «Bay kadi mi tayitii bireediije d'en jeedidi fii yimbe ben guluuje nayo, ko debeeje jelu tew kunte bireedi artirnodon?»

Be jaabii: «Ko de jeedidi.»

²¹ O wi'i be kadi: «Hara on faamaali haa jooni?»

Fii no Iisaa Wuntiniri Bundo goo Bayti-Sa'iida

22 Bawto d'un be yahi Bayti-Sa'iida. Be addani mo bundo, be jeeji mo yo o meemu mo fii yo o sellin mo. **23** Onsay o jogii jungo bundo on, o nabi mo ka baawo hodo. O wadi tuuta ka gite on, o *fawi juude makko den e hoore makko, o landii mo, o wi'i: «Hida yi'ude godfun?»

24 O banti gite d'en, o wi'i: «Mido haccaade yimbe, kono mido yiirude be wa ledse wonde yahude.»

25 Iisaa waditi kadi juude d'en ka gite makko. Bundo on ndaari tenyini, o ndikki, o yi'i fow ko laabi. **26** Onsay Iisaa immintini mo yo o hootu ka makko e hoore himo wi'a: «Wota a naatu ka hodo.»

*Fii Qirritannde Petruusu nden
(Mat. 16.13-20; Luk. 9.18-21)*

27 Nde Iisaa naatunoo e kodooli Seezariiya-Filiipu din, o landii taalibaabe makko ben ngal landal d'oo, o wi'i: «E wi'i yimbe ben, ko hombo woni lan min?»

28 Be jaabii mo: «Wobbe no wi'a ko onon woni Yaayaa lootaynoodo on, wobbe kadi no wi'a ko onon woni Iiliya, wobbe goo kadi no wi'a ko on goddo goo e annabaabe ben.»

29 O landii be kadi, o wi'i: «Onon non wi'udon ko hombo woni lan min?»

Petruusu jaabii mo, wi'i: «Ko onon woni *Almasiihu on!»

30 Iisaa yamiri be, tentini, wota be wowlan hay gooto ko hombo woni mo.

*Fii Tampereeki Iisaa din e Artugol makko ngol
(Mat. 16.21-28; Luk. 9.22-27)*

³¹ Onsay o fuddii be jannude wonde bee *Bii-Aaden on tampa fota, awa kadi mawbe ben e hooreebe *yottinoobe sadaka ben haa nabani jannoobe fii Sariya on wikkoyto mo, o waree, o immintinoyee ka jalaande tammere. ³² Tawi ko no laabiri o yewtata dii piiji. Petruusu pottini mo sera, o woni mo e felugol.

³³ Kono Iisaa yeyyitii, o ndaari taalibaabe makko ben, o felii Petruusu, o wi'i mo: «Yilt baawo an, yo Ibuliisa, ko fii mijooji maa din hinaa di Alla, kono ko di yimbe ben!»

³⁴ Onsay o noddi jamaa on e taalibaabe makko ben, o wi'i be: «Kala faalaado jokkude lan, yo o hayfintino, o yetta *leggal makko altindiraangal ngal,^d o jokkammi. ³⁵ Kala faalaado dandude ngurndan mun, d'an hayriray mo, kono kala non mo ngurndan mun hayriraa sabu an min e Kibaaru Mooyo on, haray ontigi dandoyay d'an. ³⁶ E ko nafa hondun woodani neddo hebugol aduna on fow, hayra wonkii mun kin? ³⁷ Maa ko hondun neddo ittata fii sottugol wonkii mun kin? ³⁸ Awa kadi, kala hersirfo lan, hersiri kongudi an din e hakkunde oo jamaa jinoowo wada junuubi, Bii-Aaden on kadi hersiroay mo tuma o ardoi e mangural Ben makko ngal wondude e malaa'ikaabe laabube ben.»

9

¹ O wi'i be kadi: «Ka haqiiqa mi andinii on, no woodi wobbe e mon onon wonbe doo ben,

^d **8:34** 8.34 «Yettugol leggal mun altindiraangal ngal» ko hebilagol jokkugol Iisaa haa maaya.

be maayataa ado be yi'ude *laamu Alla ngun no ardi e doole.»

*Fii Waylannde Mbaadi Iisaa ndin
(Mat. 17.1-13; Luk. 9.28-36)*

² Balde jeegoo bawto d'un, Iisaa yetti Petruusu e Yaaquuba e Yuuhanna, o nabi be kambe tun e hoore fello toowungo. Mbaadi makko ndin waylii yeeso mabbe, ³ conci makko din jalbi. Hakkee ko di rawni alaa wuppoowo e hoore ndii leydi labbiniroowo non. ⁴ Iiliya e Muusaa feejani be, be woni e yewtidugol e makko kanko Iisaa.

⁵ Onsay Petruusu yetti haala kan, o wi'i Iisaa: «Karamoko'en, no moyyi ka wonen doo. Darnen togooji tati, onon wonndu, Muusaa wonndu, Iiliya kadi wonndu.» ⁶ (Tawi kanko Petruusu o andaa ko o woni wowlude, ko fii hari kambe tato kulol heewii e mabbe.)

⁷ Tun duulere ari buumi be. Onsay hawa yalti ka duulere, wi'i: «Oo doo ko Biddo an yidaado. Heditee mo!»

⁸ Tun taalibaaibe ben ndaari binde don, be yi'itali hay gooto, si hinaa kambe tun e Iisaa.

⁹ E nder ko be tippotoo kon ka fello, Iisaa yamiri be wota be wowlan hay gooto ko be yi'i kon, haa nde *Bii-Aaden on immintinaa e hakkunde maybe ben woo. ¹⁰ Be maanditi ngol kongol e nder yeddondirgol hakkunde mabbe, hibe wi'a: «Ko hondun woni immitagol e hakkunde maybe ben?»

¹¹ Onsay taalibaaibe ben landii mo, be wi'i: «Ko fii hondun jannoobe fii Sariya on ben wi'anta wonde ko Iiliya haani arude taho?»

12 O jaabii be, o wi'i: «Ko goonga Iiliya aray taho, wattitoo fow. Ko hondun windii fii Bii-Aaden on? Hinaa o tampay fota, o wikkii?
13 Kono mi andinii on Iiliya ariino, kono be wadiri mo no be faaliraa non, wano windori fii makko non.»

*Fii no Iisaa Selliniri Jinnaado goo
 (Mat. 17.14-21; Luk. 9.37-43)*

14 Bay be hewtitii takko taalibaabe ben, be yi'i jamaa djuududo e jannoobe fii Sariya on takko mabbe no yeddondira e mabbe. **15** No jamaa on yiirunoo Iisaa, be ηaldī fota, be dogi fii hiwroyagol mo. **16** Kanko Iisaa o landii be, o wi'i: «Ko e hoore hondun wondon yeddondirde e mabbe?»

17 Onsay gorko goo e nder jamaa on jaabii mo wi'i: «Karamoko'en, mi addanii on oo bidso an gorko, mo jinnawii mbobindinayngii nangi. **18** Tuma ngii nangi mo woo, ngii libay mo ka leydi, o yaltina ngurda, o ηatindira piiye den, o yoora ken. Mi torike taalibaabe mon ben radagol ngii jinnawii, kono be waawaali.»

19 Iisaa jaabii be, wi'i: «Onon ko on jamaanu ngu gomdinää. Ko haa honde tuma mi wondata e mon? E ko haa honde tuma mi muujnantoo on? Addanee lan mo doo.»

20 Onsay be addani mo mo. No paykun kun yiirunoo Iisaa, jinnawii ngin iirini kun, kun yani ka leydi, kun woni e tallagol, yaltina ngurda. **21** Onsay Iisaa landii ben paykun kun: «Ko gila honde tuma d'un hewtitii kun?»

Ben makkun jaabii: «Ko gila e booboyaagal makko. **22** Awa kadi soono woo jinnawii ngin

bugoto kun ka yiite e ka ndiyani fii mulugol kun. Kono si tawii hidon waawi godfun, yurmee men, wallon men!»

²³ Iisaa kadi wi'i mo: «Wi'udaa si mido waawi! Fow no newanii gomdfindo!»

²⁴ Tun ben paykun kun ewnii, wi'i: «Mido gomdfini! Kono wallitee lan ko fii gomdfinal an ngal no njakkanimmi!»

²⁵ Bay Iisaa yi'ii jamaa on no doga, ara e mabbe, onsay o tonjani jinnawii ngin, o wi'i: «Ko an, yo jinnawii mbobinfayngii, mi wi'ii ma yo a yaltu e makko, wota a naatitu e makko hande kadi!»

²⁶ Onsay ngii haaci, e hoore iiringol kun ko tiidi, ngii yalti e makkun. Paykun kun wa'i wa maykun, haa duudube wi'i: «Kun maayii!»

²⁷ Kono Iisaa jogii kun, immini, kun darii.

²⁸ Bay wonii Iisaa naatii ka suudu, taalibaabe makko ben landii mo e gundoo, be wi'i: «Ko fii hondun menen men waawaali radaade ngii jinnawii?»

²⁹ O wi'i be: «Sifa ngii jinnawii, ko toragol Alla tun waawata ngii yaltinde.»

³⁰ Onsay be iwi d'on, be tayitoyi Jaliilu. Tawi Iisaa faalaaka andee ko honto o woni, ³¹ ko fii hari himo jannude taalibaabe makko ben, o wi'a be: «Bii-Aaden on wattete e juudse yimbe ben, be wara mo. Baldse tati bawto maygol makko, o immitoo.» ³² Kono hari taalibaabe ben alaa faamude din kongudi, awa kadi be huli landitagol mo di.

*Fii Burdo Teddude on e Hakkunde Maabbe
(Mat. 18.1-5; Luk. 9.46-48)*

³³ Onsay be hewti Kafernahuum. Bay be naatii ka suudu, Iisaa landii be, wi'i: «Ko e hoore hondun wonnodon yeddondirde ka laawol?»
³⁴ Kono be deyyi, ko fii hari ka laawol be yewtidii fii andugol ko hombo buri teddude.

³⁵ Onsay kanko Iisaa o joodii, o noddi sappoo e didoobe ben, o wi'i be: «Mo no faalaa wonude arano, o wonay sakkitoro e fi fow, kurkaadu fow.» ³⁶ Onsay o yetti paykun, o joddfini kun hakkunde maabbe. Bay o hirbike kun, o wi'i be: ³⁷ «Kala jabudo paykun tosokun e innde an, haray ko min tigi o jabi. Awa-le kala jabudo lan, haray hinaa min tigi o jabi, kono ko Nuludo lan on.»

³⁸ Onsay Yuuhanna wi'i mo: «Karamoko'en, men yi'ii goddo no radoo jinnaaji e innde mo'on. Men tonjani mo d'un bay o wondaa e amen fii jokkugol on.»

³⁹ Kono Iisaa wi'i: «Wota on tonjan mo d'un. Ko fii hay gooto waawataa wadude kaawake moyyo e innde an, yiltoo kisan bawto d'un, wowlammi ko boni. ⁴⁰ Ko fii kala mo wonaa gajo men, haray ko gido men. ⁴¹ Awa kadi, kala okkordo on ndiyan yareeedan e innde an min, fii ko on be *Almasiihu on, ka haqiiqa mi andinii on o fadataa mbarjaari makko ndin few.

⁴² «Kono on mo woni sabu feggingol gokkun e koy paykoy gomfinkoy lan, haray ko buri mo moyyande ko kolmbireede tuntere hayre, o bugee ka baharu. ⁴³⁻⁴⁴ Si tawii jungo maa ngon wonay sabu haa feggodaa, haray tayu ngo. Ko fii no buru-maa moyyande ka naataa ka ngurndan, hara ko a taya-jungoojo, edii a

jogaade juude dīdi yahaa ka jahannama, ka yiite nge daanotaako. ⁴⁵⁻⁴⁶ Si tawii-le koyngal maa ngal wonay sabu haa feggodaa, haray tayu ngal. Ko fii no buru-maa moyyande ka naataa ka ngurndan, hara ko a taya-koyngaljo, edii a jogaae koyde didi, bugedaa ka jahannama. ⁴⁷ Si tawii-le yiitere maa nden wonay sabu haa feggodaa, haray awu nde. Ko fii no buru-maa moyyande ka naataa ka *laamateeri Alla hara ko mo a yiitere wootere, edii a jogaae gite didi, bugedaa ka jahannama ⁴⁸ ka gildi maabbe din maayataa don e ka yiite ngen daanotaako don.

⁴⁹ «Ko fii kala neddo lensinirte yiite. ⁵⁰ Landan ko huunde moyyere, kono si dakamme majjan on iwii, haray ko honno dakamme majjan on wattirtee? Wadhee landan e mon onon tigi, wondon e hoore buttu.»

10

*Fii Sertigal Yettindirbe
(Mat. 19.1-12; Luk. 16.18)*

¹ Onsay Iisaa iwi don, o ari ka seraaji diiwal Yahuuda gadsa Yurdayniwol, jamaa on moobii kadi takko makko. Wano o woowiri non, o woni e jannugol be kadi.

² Onsay *Fariisiyaabe goo badii mo fii ndarndagol mo, be wi'i: «E hara no daganii goddo accitugol beyngu mun?»

³ O jaabii be, o wi'i: «Ko hondun Muusaa yamiri on?»

⁴ Fariisiyaabe ben wi'i: «Muusaa no newnani ontigi wadangol beyngu mun kaydi sertigal, accita mo.»

⁵ Iisaa kadi wi'i ße: «Ko sabu cattal mon bernde ngal wadi si Muusaa windani on nden yamiroore. ⁶ Kono ka fuddoode, Alla tagii ße, o wadi ße gorko e debbo.

⁷ *Ko dñun wadi si gorko selay ben mun e yumma mun,*

humoo e ßeyngu mun,

⁸ *onsay kambe dido ße wona gooto.»^e*

Dun haray hinaa ße dido hande kadi, kono ko gooto. ⁹ Awa wota goddo sendindir ko Alla hawtindiri kon.»

¹⁰ Bay wonii ße naatoyii ka suudu, taalibaabe ßen landii mo kadi fii dñun. ¹¹ O jaabii ße, o wi'i: «Kala accitudo ßeyngu mun, yetti goddo goo, haray ontigi jeenii e telen-ma makko. ¹² Si debbo kadi seedii e moodi mun, yettoyaama ka goddo, haray on debbo kadi jeenii.»

Fii no Iisaa Du'orani Paykoy koy

(Mat. 19.13-15; Luk. 18.15-17)

¹³ Onsay yimbe ben addani mo paykoy fii yo o meemu koy, kono taalibaabe ßen tonjani ben.

¹⁴ Bay wonii Iisaa yi'ii dñun, o tikki, o wi'i: «Accee paykoy koy ara e an, wota on hadu koy, ko fii *laamu Alla ngun ko sifa makkoy wonani. ¹⁵ Ka haqiiqa mi andinii on, kala mo jaßiraali laamu Alla ngun wa paykun, haray o naatataa ton few.»

¹⁶ Bawto dñun o hirbii paykoy koy, o *fawi juude makko den e makkoy, o du'anii koy.

Fii Hooreejo Aldudo on

(Mat. 19.16-30; Luk. 18.18-30)

¹⁷ Bay wonii Iisaa fokkitii, onsay goddo dogi, ari, jicci yeeso makko. O landii mo, o wi'i: «Karamokoojo moyyo, hara ko hondun mi haani wadude fii yo mi heboy *ngurndan poomayankejan dan?»

¹⁸ Onsay Iisaa jaabii mo, wi'i: «Ko fi hondun wi'irtaa mi moyyo? Hay gooto moyyaa si hinaa Alla Bajjo on. ¹⁹ Hida andi yamirooje den: d'un ko wota a ittu hoore, wota a jeenu, wota a wujju, wota a seedito fenaande, wota a janfo hay gooto, teddinaa kadi yumma maa e ben maa.»^f

²⁰ O jaabii, o wi'i: «Karamoko'en, mido wadude d'un fow gila e cukankaaku an.»

²¹ Bay Iisaa ndaaririi mo giggol, o wi'i mo: «No njakkan-maa fahin huunde wootere: yahu yeeyitaa kala ko jeydcaa, okkaa miskinbe ben, d'un wonanoyte keyee ka kammuuli, onsay araa jokkaa mi.» ²² Bay on nanii din kongudi, o nirbinii, o yahi himo aani, ko fii hari himo aldi fota.

Fii Accube ko Jeyi kon fow, Jokki Iisaa

²³ Onsay kanko Iisaa o wi'i taalibaabe makko ßen: «Emba no sattani jom jawle en ka be naata ka laamu Alla.»

²⁴ Taalibaabe ßen njaldi fii din yewtereeji. Kanko Iisaa o fillitii kadi, o wi'i be: «Faybe an, emba naatugol ka laamu Alla no satti. ²⁵ No buri weebande ngelooba ka mba rewa e wuddere meselal edii ka jom jawle en naata ka laamu Alla.»

^f **10:19** 10.19 Egg. 20.12-16

26 Taalibaabe ben burti ɻaldude kadi, be woni e wi'indirgol: «E hara ko hombo dandoytee?»

27 Iisaa ndaari be, wi'i: «Dun waawantaako neddanke, kono Alla kan wonaa non, kala huunde no waawanoo mo.»

28 Onsay Petruusu wi'i mo: «Awa e hino, men accii ko men jeyi kon fow, men jokkii on.»

29 Iisaa jaabii, o wi'i: «Ka haqiiqa mi andinii on, kala accudo suudu mun ndun e musibbe mun ben e bandiraabe mun ben e yumma mun e ben mun e bibbe mun ben e gese mun den sabu innde an nden e Kibaaru Moyyo on, **30** o heboyay ko buri dfun laabi teemedere: cuudi e musibbe e bandiraabe e neeniraabe e bibbe e gese e cukkeede ka aduna doo. Ka aduna aroyoowo o heboyay ngurndan poomayankejan. **31** Kono wonbe yeeso buy wontiroyay baawo, baawoobe ben wontiroya yeeso.»

*Fii ko Saatii Heboyde Iisaa kon
(Mat. 20.17-19; Luk. 18.31-34)*

32 Nde tawnoo hibe ka laawol fii yahugol Yerusalaam, Iisaa wonti yeeso mabbe, taalibaabe ben ɻaldfi, jokkunoobe ben kadi huli. Iisaa pottini sappoo e didooobe ben sera, o woni be e yewtugol ko heboyta mo kon. **33** O wi'i be: «Awa hidjen yahude Yerusalaam. Bii-Aaden* on wattete e juude hooreebe yottinoobe sadaka ben e jannoobe fii Sariya on ben, be happana mo wareede, be watta mo e juude be wonaa Yahuudiyanke ben, **34** ben jala mo, be tutta e hoore makko, be focca mo, onsay be wara mo. Balde tati bawto dun o immitoo.»

*Fii ko Yaaquuba e Yuuhanna Torii Iisaa kon
(Mat. 20.20-28; Luk. 22.25-27)*

³⁵ Onsay Yaaquuba e Yuuhanna, dун ко биbbe Zabadii бен, бадии Iisaa, бе wi'i mo: «Karamoko'en meden faalaa yo on wadan men ko men torotoo on kon.»

³⁶ O wi'i be: «Ko hondun faaladon yo mi wadan on?»

³⁷ Be wi'i mo: «Ko yo on newnan men joodoyagol ka laamu mon darjinngu, goddo e amen wonira ka jaamo mon, oya on ka nano mon.»

³⁸ Kono Iisaa wi'i be: «On andaa ko wondon lan toraade. E hara on waaway yarirde jardukun tampere kun mi yarirta kun, maa looteede lootannde tampere nde mi lootoytee nden?»

³⁹ Be jaabii: «Men waaway.»

Iisaa wi'i be kadi: «Ko goonga on yariray jardukun kun mi yarirta kun, e on lootete lootannde tampere nde mi lootoytee nden. ⁴⁰ Kono fii joodoyagol ka jaamo an maa ka nano an, hinaa min yedata dун: don no yedaa be fii mun eбжанaa бен.»

⁴¹ Bay beya taalibaabe sappo nanii дун, бе fuddii seytinande Yaaquuba e Yuuhanna.

⁴² Onsay Iisaa noddi be, o wi'i: «Hidon andi bee бе jogitorden wa hooreebe diya leyyi no laamori di doole, awa kadi lambe mabbe бен no feyyintini laamu ngun e hoore mabbe. ⁴³ Kono onon, wota on wa'u wa бен. Kala faalaado wonde teddudo e hakkunde mon, yo wonu kurkaadu mon. ⁴⁴ Awa kadi kala faalaado wonde yeesoojo e hakkunde mon, yo wonu maccudo fow, ⁴⁵ ko fii Bii-Aaden on ardaali fii kurkanegol,

kono ko fii kurkanagol, okkitira ngurndan mun
dan fii cottudi duudube.»

*Fii no Iisaa Wuntiniri Bundo Yeerikoo
(Mat. 20.29-34; Luk. 18.35-43)*

⁴⁶ Onsay be hewti Yeerikoo. Bay wonii kanko Iisaa e taalibaabe makko ben e jamaa duufudo on be yaltii don, tawi bundo torotoodo no wi'ee Bartimaawu, on ko biddo oo wi'eteedo Timaaawu, no joodii ka sera laawol. ⁴⁷ O nani wonde ko Iisaa oo jeyaado Naasirata woni feyyude. Onsay o woni e ewnagol, wi'a: «Ko an yo Iisaa, bii Daawuuda, yurminan!»

⁴⁸ Duudube feli mo fii yo o fanku, kono o burti ewnaade, wi'a: «Ko an yo bii Daawuuda, yurminan!»

⁴⁹ Onsay Iisaa dartii, o wi'i: «Noddee mo!»

Be noddi bundo on, e hoore hibe wi'a mo: «Wakkilo, immodaa, himo noddude ma!»

⁵⁰ Bundo on kadi bugii dolokke mun on, immii tinna, o ari e Iisaa.

⁵¹ Onsay Iisaa jaabii mo, wi'i: «Ko hondun faaladcaa yo mi wadane?»

Kanko bundo on o wi'i mo: «Karamoko'en, ko yo mi hettu giide an den.»

⁵² Iisaa wi'i mo kadi: «Yahu, gomfinal maa ngal hisinii ma.» Don kisan o wunti, o woni e jokkugol Iisaa e yaadu ndun.

11

Fii Naatugol Iisaa Yerusalaam

(Mat. 21.1-11; Luk. 19.28-40; Yhn. 12.12-19)

¹ Bay wonii be badike Yerusalaam haa be hewtii Bayti-Faazii e *Betanii, dun ko takko Fello

*Zaytuuni ngon, kanko Iisaa o nuli taalibaabe makko dido, ² o wi'i be: «Yahee e ngoo hodo wongo yeeso mon doo. No naatirdon e maggo on taway don mbabun kun goddo wadfaaki haa hande no humii don. Hunton kun, addon. ³ Si goddo aru on e landaade: ‹Ko hondun wadanton dun?›, on wi'ay mo: ‹Ko haaju Koohoojo on yani e makkun. O artiray kun ko neebaa.› »

⁴ Onsay be yahi, be tawi mbabun no humii ka yaasi e binde dambugal ka d'atal, be hunti kun. ⁵ Wobbe e wonnoobe don ben wi'i be: «Ko hondun wadi si hidon huntude mbabun kun?» ⁶ Be jaabori no Iisaa wiirunoo be non. Onsay be acci be yahi. ⁷ Be addani Iisaa mbabun kun. Be ndadsani mo conci mabbe din e hoore makkun. Iisaa joodii e hoore makkun. ⁸ Yimbe buy ndadsani mo conci mun din ka laawol, wobbe caldi fi be saltii ka buruure din. ⁹ Tawi hikkornoobe yeeso makko ben e iwtirnoobe baawo ben no ewnaade wi'a:

«*Hosannaa!

Yo barki wonan oo wondo arude e innde Joomiraado on!

¹⁰ Barki wonanii nguu laamu wongu arude, d'fun ko nguu laamu ben men Daawuuda! Darja burdo toowude wonanii ma!»g
¹¹ Bay Iisaa naatii Yerusalaam, o yahi ka *julirde mawnde, o taskii fow. Nde tawnoo nibbii, o yahi Betanii kanko e sappoo e didooibe ben.

Fii no Iisaa Hudiri Yibbehi
(Mat. 21.18-19)

12 Bimbi nden jande, ko be yaltata Betanii, kanko Iisaa o weelaa. **13** O haynii yibbehi maruki haako ka wodditii. O yahi ndaarugol si o taway ton godđun. Bay o badike o tawi ko haako tun, ko fii hari hinaa dabbunde yibbe. **14** Onsay o wi'i ki: «Wota godđo jaamitu hande kadi fibbe maa ben.» Taalibaabe makko ben nani ko o wi'i kon.

Fii no Iisaa Radori Yeeyoobe ben ka Juulirde Mawnde

(Mat. 21.12-17; Luk. 19.45-48; Yhn. 2.13-16)

15 Bay be hewtii Yerusalaam, Iisaa naatiri ka dingiral juulirde mawnde, o woni e radagol yeeyaynoobe ben e soodaynoobe ben ka juulirde. O wayliti taabe wadaynoobe sensa-sensita ben e julle yeeyaynoobe gabooji ben. **16** Tawi o jabataa hay gooto nabora godđun ka nder dingiral juulirde, **17** e hoore himo jannaynoo be, wi'a: «Hinnaa no windii: «Suudu an ndun innoyte suudu torordu ndu leyyi din fow torotoo Alla e mun?»,^h Kono onon on wattii ndu fammeere wuybe!»ⁱ

18 Kono bay hooreebe *yottinoobe sadaka ben e jannoobe fii Sariya on nanii đun, be woni e dađbugol feere no be sahinbinira mo. Kono tawi hibe huli mo, ko fii hari jamaa on fow no njaldidi e ko o jannata kon. **19** Bay nibbii, Iisaa e taalibaabe mun ben yalti ka saare.

Jannde fii Yibbehi kin
(Mat. 21.20-22)

^h **11:17** 11.17a Isa. 56.7

ⁱ **11:17** 11.17b Yer. 7.11

20 Wa ko be feyyata bimbi, taalibaabe
ben yi'i kiya yibbehi no yoori haa ka dadi.
21 Onsay Petruusu anditi ko feyyi kon. O wi'i
Iisaa: «Karamoko'en, ndaaree! Yibbehi ki
hudunodfon kin yoorii!»

22 Iisaa yetti haala kan, wi'i be: «Gomdinee Alla!
23 Ko fii, ka haqiqiqa mi andinii on, si
goddo wi'u ngoo fello yo ngo boro dfoo, ngo yaha
ka baharu, hara o sikkitaaki ka bernde makko,
hara himo gomdfini ko o wi'i kon waday, d'un
wadante mo. **24** Ko d'un wadi si mi wi'ay on,
kala ko landifon e nder toragol Alla, hoolee
on hendike d'un, d'un wadante on. **25** Nde
hidon toroo Alla, hara hidon seytinani godfso,
yaafee mo, fii no Ben mon Wondo ka kammu
on yaaforana on onon kadi bonnereeji mon din.
26 Kono si on yaafanaaki be, haray Ben mon
Wondo ka kammu on kajun kadi yaafantaako
on bonnereeji mon din.»

Lande fii Bawgal Iisaa ngal
(Mat. 21.23-27; Luk. 20.1-8)

27 Be yiltitii kadi Yerusalaam. E nder ko Iisaa
jindata kon ka nder juulirde mawnde, hooreebe
yottinoobe sadaka ben e jannoobe fii Sariya on
wondude e mawbe ben ari e makko. **28** Be wi'i
mo: «Ko e ley kongol hombo wondaa wadude
d'un e ko e ley kongol hombo wondaa fii ko
wondaa wadude koo?»

29 Iisaa jaabii be, wi'i: «Min kadi mi landoto
on huunde wootere. Si on jaabike lan, onsay
mi yeetoto on ko e ley kongol hombo mi woni
wadfirde d'un. **30** E hara lootugol ko Yaaya

lootaynoo yimbe ben kon, ko honto iwri: ko ka arsi, kaa ko e neddanke? Jaabee lan.»

³¹ Kono be wi'indiri: «Si en jaabike mo ko ka arsi iwri, o wi'ay en ko hondun hadunoo gomdfinen mo? ³² Si en jaabike mo-le ko e neddanke d'un iwri.» (E hin-le hibe huli jamaa on, ko fii fow no jogori Yaayaa wa annabaajot tigi.) ³³ Onsay be jaabii Iisaa: «Men andaa.»

Kanko kadi o wi'i be: «Min kadi mi wowlantaa on ko e ley kongol hombo mi woni wadirde d'un.»

12

Misal Yettaangal e Halfnaabe Tutateeri Wiijnu

(Mat. 21.33-46; Luk. 20.9-19)

¹ Bawto d'un Iisaa woni kadi yewtirgol be mise, o wi'i be: «Goddo tutuno *wiiju, o howi tutateeri ndin, o jasi ngayka fii ka wiiju on oyee, o wadi bente ka reenoowo on wona, o halfini ndi remoobe wiiju ben, o yahi safaari.

² Bay saa'i sonitugol wiiju on hewtii, o immini kurkaadu makko haa e remoobe wiiju ben fii yo ben jonnan mo bibbe wiiju gebal makko ngal.

³ Kono ben hendii mo piyi, be immintini mo juude mehe. ⁴ O immini kurkaadu makko goo kadi, be piyi ondon kadi e hoore, be hersini. ⁵ O immini kadi tammo, be wari on. E duudube be o imminnoo piyaa, wobbe waraa.

⁶ «Tawi ko biddo makko yidaado on tun o luttiirnoo. Ka sakkitorun o immini mo haa e mabbe, himo wi'a: ‹Be teddinay biddo an on.›

⁷ «Kono kambe remoobe wiiju ben be haldi: ‹Bay ko oo woni ronoowo on, waren mo, d'un

ndondi ndin wontanay en!» ⁸ Onsay be nangi mo, be wari, be bugii ka baawo tutateeri wiiju.»

⁹ Iisaa wi'i kadi: «Jooni non, hara ko hondun jom ndin tutateeri wiiju wadata ben? On aray, re'a ben remoobe wiiju, o jonna tutateeri ndin wobbe goo.» ¹⁰ Onsay Iisaa wi'i be kadi: «E hara on jangaali ko bindi d'in wi'i kon? Ko fii hid'i wi'i wonde:

«Hayre nde mahoobe ben hawkunoo nden
wontii hittunde ka sobbundu.

¹¹ Dun ko e Joomiraado on iwri,
d'un no hawnii e gite men!» »j

¹² Bay be faamii wonde ko fii mabbe Iisaa wadsani ngal misal, be woni e daabbugol feere no be nangira mo, kono hari hibe huli jamaa on. Onsay be acci mo d'on, be yahi.

*Fii no Iisaa Ndarndoraa fii Yobugol Sagalle
(Mat. 22.15-22; Luk. 20.20-26)*

¹³ Onsay be immini e Iisaa *Fariisiyaabe goo e yimbe Heroodu goo fii ko nangira mo kongudi makko d'in. ¹⁴ Ben ari, wi'i mo: «Karamoko'en meden andi ko on nundube, awa kadi on denyotaako hay gooto, ko fii on burdindinaa yimbe ben, hidon jannirde laawol Alla ngol goonga. E hara no haani ka men yofa lando mawdo Roomu on sagalle, kaa haanaa? Meden haani yobude kaa men haanaa yobude?»

¹⁵ Nde tawnoo Iisaa no andi faasiqyaagal mabbe ngal, o jaabii be, o wi'i: «Ko fii hondun ndarndorton mi? Addanee lan *dinaruuru, mi ndaara.» ¹⁶ Be addi wooturu. Iisaa landii be

wi'i: «Ko nandolla hombo e bindi hombo woni e mayru?»

Be jaabii: «Ko lando mawdo Roomu on.»

¹⁷ Onsay o wi'i be: «Jonnitee lando mawdo Roomu on ko makko kon, jonniton Alla kadi ko mun kon.» Be ɻaldfi e makko.

*Fii Sadduusiyaabe ben e Ummatal ngal
(Mat. 22.23-33; Luk. 20.27-40)*

¹⁸ Sadduusiyaabe*, wi'ube wonde ummutal alaa ben, ari landii Iisaa, be wi'i mo:
¹⁹ «Karamoko'en, e hino ko Muusaa wi'i men kon: Si goddo maayii accii beyngu e baawo biddo, haray mijnpiraawo on maydo no haani yettude on keynguujo mo o acci fii no o hebirana on kotiraawo makko jurriya. ²⁰ Tawa non ben bibbe ko be njeedido. Arano on jombii, maayii, accaali jurriya. ²¹ Dimmo on kadi yettii on keynguujo, maayii, accaali jurriya. Tammo on kadi wano non. ²² Tawii hay gooto e ben njeedido accaali jurriya. Bay feyyii e mabbe be fow, debbo on kadi maayii. ²³ Bay hari ben njeedidoo non resii on debbo, ko hombo e ben on debbo wontanoyta ka ummutal?»

²⁴ Iisaa jaabii be, wi'i: «E hino ko wadi kon si hidon e nder palji, ko fii on alaa faamude bindi din, on alaa faamude kadi bawgal Alla ngal. ²⁵ Ko fii ka ummutal, worbe ben resataa, rewbe ben kadi resetaake, kono be wa'ay wa malaa'ikaabe ben ka kammuuli. ²⁶ E on jangaali ka deftere Muusaa fii maybe ben kan e ummutal mabbe ngal, ko Alla daalani mo kon ka binde pitahun, wonde: «Ko min woni Alla Ibraahiima e Alla

Issaaqa e Alla Yaaquuba,^k ²⁷ Awa Alla wonaa Alla maybe ben kono ko o Alla wurbe ben. Awa on faljii few!»

Fii Yamirooje Burde Mawnude den
(Mat. 22.34-40; Luk. 10.25-28)

²⁸ Godcfo e jannoobe fii Sariya on ben, bay nanii ko be yewtidi kon, o ndaarii kadi o tawii Iisaa jaaborii no moyyiri, o badii, o landii mo: «E nder yamirooje den fow ko hondun adii?»

²⁹ Iisaa jaabii, wi'i: «E hino ko adii kon: «Heditee yo *Banii-Isra'iila'en, Alla Joomiraado men on ko Joomiraado gooto, ³⁰ awa kadi yo a yidfir Alla Joomiraado maa on bernde maa nden fow e wonkii maa kin fow e hakkil maa kin fow e doole maa den fow.»^m ³¹ E hino ko hikki don kon: «Yo a yidfir nokondo maa on wano yidsirfaa hoore maa non. Yamirooje goo burde dee mawnude alaa.» ⁿ

³² On jannoowo fii Sariya on wi'i mo: «Moyyii, yo karamoko'en, on wowlii goonga wi'ugol Alla ko Bajjo, goddo goo kadi alaa ko wonaa kanko, ³³ yidfira mo bernde mun nden fow e hakkil mun kin fow e doole mun den fow, e yidsirgol nokondo mun wa hoore mun, d'un no buri sadakaaji sunneteedi din fow e diya sadakaaji fow.»

³⁴ Bay Iisaa ndaarii tawii o jaaborii hakkil, o wi'i mo: «A woddfondiraa e *laamu Alla ngun.» Bawto d'un hay gooto suusaali mo landaade.

Fii Hakkunde Almasiihu on e Daawiuda
(Mat. 22.41-46; Luk. 20.41-44)

k **12:26** 12.26 Egg. 3.6 m **12:30** 12.30 Yap. 6.4-5 n **12:31**
12.31 Lew. 19.18

³⁵ Wa fewndo ko Iisaa jannata ka *juulirde mawnde, o wi'i: «Ko honno jannoobe fii Sariya on ben waawiri wi'ude wonde *Almasiihu on ko jurriya Daawuuda? ³⁶ E hin-le, immorde e *Ruuhu Seniido on, Daawuuda tigi no wi'i: ‹Joomiraado on daalani Joomi an on:

Joodor ka sengo an jaamo,
haa mi wada aybe maa ben ka ley teppe
maa.»ⁿ

³⁷ «Daawuuda tigi wi'ii Almasiihu on ‹Joomi›, haray ko honno non Almasiihu on woniri jurriya makko?»

Tawi jamaa duuduso no hedii mo e nder weltaare.

³⁸ O wi'i be e nder ko o waajotoo kon: «Reenee e bee jannoobe fii Sariya on, d'un ko bee yidube jindidugol e dolokkaaji njani, yidi hiwreede ka fottirde, ³⁹ yidi saffawol aranol ngol ka juulirde, yidi ndacsule arane den ka nafagol. ⁴⁰ Hibe jatta galleji keynguuße, hibe junna julde maßbe fii yiingo. Awa ben heboyay jaawooje burde sattude.»

*Fii Sadaka mo Keynguujo on Itti on
(Luk. 21.1-4)*

⁴¹ Onsay Iisaa joodii ka yeeso arkawal sadaka, o woni e ndaarugol wadaynoobe ton kaalisi ben. Aldube buy wadi ton kaalisi duudusi. ⁴² O yi'i kadi keynguujo baaso no liba ton tammahoy didoy, fotaykoy e peccun gootun si mbuufu feccaama nay. ⁴³ Onsay kanko Iisaa o noddi taalibaabe makko ben, o wi'i be: «Ka haqiiqa mi andinii on, ko oo keynguujo baaso itti kon

no buri ko beya fow itti kon wadi ka arkawal sadaka. ⁴⁴ Ko fii beya fow ko ko burtani d'un kon be wadi, kono kanko keynguujo on e waasidude, ko ko o mari kon fow fii ko o wuurira o wadoyi ton.»

13

Maandeeji fii Artoygol Iisaa Almasiihu on (Mat. 24:1-2; Luk. 21:5-6)

¹ Wa fewndo ko Iisaa iwata ka *juulirde mawnde, goddo e taalibaabe makko ben wi'i mo: «Karamoko'en, ndaaree kaaye labaade e darnoodi fotundi!»

² Iisaa jaabii mo, wi'i: «A yi'ii ndii darnoodi mawndi? Hay hayre e hoore hayre luttoytaa doo ko lancaaka.»

³ Onsay o joodoyii ka Fello *Zaytuuni yeeso juulirde nden. Onsay Petruusu e Yaaquuba e Yuuhanna e Andaraawu landii mo e gundoo, ⁴ be wi'i: «Yeeto men ko honde suma d'un wadoyta, e ko hondun wonoyta maande laatagol d'un fow?»

⁵ Onsay Iisaa wi'i be: «Reenee fii wota hay gooto faljin on, ⁶ ko fii buy aroyay baarora innde an nden, hara no wi'a ko kajun woni *Almasiihu on. Awa ben faljinoyay yimbe d'uudube. ⁷ Awa kadi, nde nanoydon fii hareeji no wowlee woo, e haalaaji fii gereeji, haray wota on hulu, ko fii bee d'un wada, kono hinaa don wonata lannoode nden. ⁸ Hareeji kadi wadoyay hakkunde leyyi din. Laamateeriji din kadi immondirana, dimbande leydi wadira e nokkeeli goo, heegeeji kadi wada. Ko d'un wonata fuddoode sattendeeji nanditaydi e muuseendi njata din.

⁹ «Awa reenee hoore mon, ko fii be naboyay on ka jaawirdi, be foccoya on ka juulirde, nabedfon ka yeesoobe ben e ka lambe ben sabu an, fii ko wonana be seedee. ¹⁰ Kono ko adii kon bee Kibaaru Moyyo on fejninanee leyyi din fow. ¹¹ Kono tuma be nabi on fii wattugol on e joge, wota on jiboyo ko wi'on. Kono wowlee ko longinadson e on saa'i dson kon tigi. Ko fii haray hinaa onon woni wowlude, kono ko *Ruuhu Seniido on. ¹² Ko fii goddo yettoyay musidso mun, watta mo e joge fii yo o ware, baabaajo kadi warra non biddo mun. Faybe ben kadi hawtanoyoo mawbe mun ben, be wona sabu haa be waree. ¹³ Fow apoyay on sabu innde an nden. Kono mo ηapnike dfun haa ka lannoode, o dandoyte.

¹⁴ «Nde yi'udon huunde harmunde caabinynde nden daakike ka nde haanaa wonude don woo,ŋ (haray yo jangoowo on faamu), onsay yo hodube ka diiwal Yahuuda ben dogir ka pelle. ¹⁵ On wondo ka fowtorde hoore suudu mun wota tippano goddfun ka nder suudu. ¹⁶ On wondo kadi ka ngesa wota yiltito fii yettugol dolokke mun on. ¹⁷ E nder den balde dson, bone wonanay sowiibe ben e muyninaybe ben. ¹⁸ Awa toree fii wota dfun ardu ndungu. ¹⁹ Ko fii satteende waday e d'en jalaade nde sifa mun wadaali haa hande, gila ka fuddoode aduna mo Alla tagi, e nde buri mun wadfitataa han kadi. ²⁰ Si tawno Joomiraado on rabbindfinaano d'en jalaade, hay gooto daddataano, kono o rabbindfinay de sabu subaabé be o subii ben.

²¹ «Awa si goddo aru on e wi'oyde wonde: «Almasiihu on no doo!» maa «himo daa!», wota on hoolo mo. ²² Ko fii waditiibe almasiihu e waditiibe annaba feenoyay, be wadoya maandeeji e kaawakeeji fii no be faljinira hay subaabé ben, si no gasaynoo. ²³ Awa reenee, ko fii mi *hiitanike on fii d'un fow.»

*Fii Ardu Bii-Aaden on, dun ko Iisaa
(Mat. 24.29-31; Luk. 21.25-28)*

²⁴ «Kono e ñ'en nalaadfe, bawto nden satteende, «Naange ngen nibbitay, tawa lewru ndun jabbataa, ²⁵ koode ñ'en ka kammu kadi yana, ko tiidi kon ka kammu kadi dimboyoo.»p

²⁶ «Ontuma non *Bii-Aaden on yi'oyte, no ara e duule, hara himo arda e bawgal mawngal e mangural. ²⁷ Onsay o nuloya malaa'ikaabe makko ben, o mooba subaabé makko ben gila funnaange hebi hirnaange e gila nano hebi naamo, gila ka leydi haa ka kattudi kammuuli.

²⁸ «Yo misal yibbehi kin wonan on gandal. Nde caldfi makki on heccidiri, ñ'i wiliti, on andanay hoore mon wonde setto ngon badike. ²⁹ Ko wano non kadi, no yiirudon ñ'i piiji no wada woo, haray andee wonde *Bii-Aaden on badike ka dambugal. ³⁰ Ka haqiiqa mi andinii on, d'un fow waday ado nguu jamaanu feyyude. ³¹ Kammu ngun e leydi ndin feyyay, kono min kongudi an din feyyataa.

³² «Kono hay gooto andaa fii nden palaande e on saa'i, hinaa hay malaa'ikaabe ben ka kammuuli, hinaa hay Biddo on, kono ko Baabaajo

on tun andi fii nden nalaande e on saa'i. ³³ Awa reenee, wattanom yiila! Ko fii on andaa nde on saa'i wonata. ³⁴ Dun no wa'i wa neddo wondo yahude safaari, acca suudu mun, o halfina mo kala e kurkaaduube makko ben golle mun, o yamira wondo ka dambugal on aynugol. ³⁵ Awa, wattanee yiila, ko fii on andaa nde jom suudu ndun artata, si ko kiikiide, maa si ko tumbere jemma, maa si ko nde ndonto no yogga, maa si ko bimbi. ³⁶ Hulee wota o aru cuppet, o tawa hidon daanii. ³⁷ Ko mi wowlani on kon, ko fow mi wowlani: wattanee yiila!»

14

Fii no Hooreebe Diina ben Haldiri Janfagol Iisaa

(Mat. 26.1-5; Luk. 22.1-2; Yhn. 11.45-53)

¹ Tawi, si balde didi feyyii, *Juldeere Yawtaneede nden e *Juldeere Bireedi de Aldaa e Lewen d'en waday. ^q Tawi hooreebe yottinoobe sadaka ben e jannoobe fii Sariya on ben no dabbaynoo ko honno be nangirta Iisaa yoyre, be wara mo. ² Tawi hibe wi'a: «Hinaa ka fewndo juldeere, fii wota murtaldu wadu e hakkunde jamaa on.»

Fii no Debbo Juuriri Nebban ka hoore Iisaa

(Mat. 26.6-13; Yhn. 12.1-8)

³ Nde tawnoo Iisaa no ka saare *Betanii ka suudu Sim'uunu oo nawnunoodo damajan, wa fewndo ko o joodii fii nafagol, debbo naati. Tawi on debbo no jogii tindohun hayre daneere tew angiri laabundi, satta-cogguuri, no wi'ee «naar».

^q **14:1** 14.1 Egg. 12

On debbo fusi tindohun kun, o juuri angiri ndin ka hoore Iisaa.

⁴ Wobbe e taalibaabe ben seytini, be wi'indiri: «Ko hondfun woni nafa bonnugol ndii angiri?

⁵ Ko fii en waawayno ndi yeeyude buri *dinaru-iji teemedde tati, okken miskinbe ben!» Onsay be felii debbo on.

⁶ Kono Iisaa wi'i: « Tertee mo! Ko fii hondfun sattinanton mo? Ko kuugal moyyal o wadanimmi. ⁷ Miskinbe ben kan, hidon wondi e maabbe soono woo, on waaway be wadande ko moyyi nde faaladon woo, kono min, on wondataa e an soono woo. ⁸ Kanko debbo on o wadii ko o waawi kon: o urnii bandu an ndun ado ndu surreede. ⁹ Ka haqiiqa mi andinii on, kala ka oo Kibaaru Mooyo fejninaa e aduna on, fii koo ko oo debbo wadi kadi sifete, o anditanee.»

Fii no Yudaasi Janfori Iisaa

(Mat. 26.14-16; Luk. 22.3-6)

¹⁰ Onsay goddo e *sahaabaabe Iisaa ben sap-poo e dido, d'un ko Yudaasi Iskariiyu, yahi tawoyi hooreebe yottinoobe sadaka ben, fii no o wattira Iisaa e juude maabbe. ¹¹ Be hedii mo, be weltori d'un, be fodi mo yeenugol mo kaalisi. Onsay, kanko Yudaasi, o woni e daabbugol feere no o wattira Iisaa e juude maabbe.

Fii Nafakka Juldeere Yawtaneede nden

(Mat. 26.17-29; Luk. 22.7-23; Yhn. 13.21-30)

¹² Ka jallal aranal Juldeere Bireedi de Aldaa e Lewen den, d'un ko jande baalun kun hirsetee, taalibaabe Iisaa ben wi'i mo: «Ko honto faaladon

yo men moyyinanoy on nafakka Juldeere Yawtaneede nden?»

¹³ Onsay o immini dido e taalibaabe makko ben, o wi'i be: «Yahee ka saare. On fottay e gorko rondiido loonde ndiyan, on jokkay mo. ¹⁴ Ka o naatiri woo, on wi'ay jom ndun suudu: «Karamoko'en wi'ii men yo men lando on ko honto be weerata, be nafoda e taalibaabe mabbe ben nafakka Juldeere Yawtaneede nden?» ¹⁵ Ontuma o hollay on konkooru njanndu, weyyitaandu wertaa, ka koore dow. Ko d'on moyyinton.»

¹⁶ Bay taalibaabe ben yahii, be hewtoyii ka saare, be tawroyi no o haalirannoo be non, be moyyini nafakka juldeere nden.

¹⁷ Bay nibbii, kanko Iisaa o ardi e sappoo e didooobe ben. ¹⁸ Wa fewndo ko be joodii, hibe nafaade, kanko Iisaa o wi'i be: «Ka haqiiqa mi andinii on, goddo e mon, mo mi woni hawtidude, janfoto lan.»

¹⁹ Onsay be fuddii aanude fota, mo bee e mabbe woni e wi'ugol mo: «E hara ko min?»

²⁰ O jaabii be, o wi'i: «Ko goddo e onon sappoo e didooobe ben, dfun ko on mo mi yollidi jungo e miran gooto. ²¹ Awa *Bii-Aaden on no yahude wano fii makko windori non, kono bone wonanii on janfotoodo Bii-Aaden on! Ko burnoo moyyande on neddo ko si o jibinanooka!»

²² E nder ko be jaamata kon, Iisaa yetti bireedi. Bay o gaynii du'aade, o tayiti, o jonni be, e hoore himo wi'a: «Jabee jaamon, dundoo ko bandu an ndun nii.»

²³ O yetti kadi jardukun wadorkun njaram, o jarni Alla, o jonni be, be fow be yari. ²⁴ O wi'i be kadi: «Dundoo ko yiyan an d'an nii, yiyan *ahadi hibboyteefan fii duudube. ²⁵ Ko fii ka haqiiqa mi andinii on, mi yaritataa hande kadi njaram fibbe *wiiju haa jaande mi yaritoysi njaram wiiju kesan ka *laamateeri Alla.»

²⁶ Bay wonii be beytii beyti Zabuura, be yahi ka Fello *Zaytuuni.

*Fii no Iisaa Hiitorifi Yeddanne Petruusu nden
(Mat. 26.31-35; Luk. 22.31-34; Yhn. 13.36-38)*

²⁷ Onsay Iisaa wi'i be: «On fow on selay lan, ko fii no windii: ‹Mi waray ngaynaako on, wuro baali ngon saakoo.›^r ²⁸ Kono tuma mi immintinaa, mi hikkanto on yeeso, tawoyon mi Jaliilu.»

²⁹ Petruusu wi'i mo: «Hay si fow selay on, min dun wonantaa lan!»

³⁰ Onsay Iisaa jaabii mo, wi'i: «Ka haqiiqa mi andinii ma, hande e oo jemma tigi, ado ndonto yoggude laabi fidfi, haray a yeddii fii an laabi tati.»

³¹ Kono Petruusu tentini fota, o wi'i: «Hay si tawii bee mi maayida e mon, mi yeddataa fii mon few!» Beya fow kadi wi'iri non.

Fii no Iisaa Torori Alla ka wi'etee don Jatsaymaani

(Mat. 26.36-46; Luk. 22.39-46)

³² Bawto dun be yahi e ndee nokkuure wi'eteende *Jatsaymaani. Kanko Iisaa o wi'i taalibaabe makko ben: «Joodfee doo haa mi

^r **14:27** 14.27 Zak. 13.7

toroyoo.» ³³ O nabori Petruusu e Yaaquuba e Yuuhanna. Onsay, o fuddii hebude annde e sokola, ³⁴ o wi'i be: «Wonkii an kin no aani haa e mayde. Wonee doo, hiiren.»

³⁵ O yahi yeeso seedfa, o sujji, o torii, o wi'i: «Si no gasa yo oo saa'i yawtan.» ³⁶ O wi'i kadi: «Abba*, Baaba an, hida waawi kala huunde. Yo kun jardukun tampere pottito lan. Kono non wota faale an on wadu, kono yo faale maa on wadu.»

³⁷ O artoyi e taalibaabe ben, o tawi be daanike. O wi'i Petruusu: «Sim'uunu, a daanike? Jaka a waawaali hiirude hay saa'i gooto? ³⁸ Hiiree torodon fii wota on naatu e jarrabi. Wonkii kin no yidi wadugol ko moyyi, kono bandu ndun no lo'i.»

³⁹ O woosditii be kadi dimmun, o torii, o fillitii dfiya kongudfi. ⁴⁰ O artoyi kadi, o tawi be daanike, ko fii hari gite mabbe den teddii. Tawi be andaa ko be wi'a mo.

⁴¹ O artoyi tammun, o wi'i be: «E on daani kadi, fowtidon? Jooni yonii, saa'i on hewtii. Awa Bii-Aaden on no watteede e juude junuubanke'en. ⁴² Immee mahen, ko fii wondo janfaade lan on badike!»

Fii no Iisaa Nangiraa

(Mat. 26.47-56; Luk. 22.47-53; Yhn. 18.3-12)

⁴³ E nder ko o yewtata kon, hawrondiri Yudaasi, tawdaado e sappoo e didooobe ben, hewtidii e jamaa jogiido kaafaaje e bedi, immorde e hooreebe yottinoobe sadaka ben e jannoobe fii Sariya on ben e mawbe ben.

44 Tawi wondo mo janfaade on wadaniino be ndee maande doo, o wi'i: «Mo mi hirbii woo, haray ko on. Nangee mo, nabon, aynon mo fota.»

45 Tun o hewti, o badii Iisaa, e hoore himo wi'a: «Karamoko'en!» Onsay o hirbii mo. **46** Onsay ben yimbe fawi Iisaa juude, be nangi mo. **47** Tun goddo e wonnoobe d'on ben sorti kaafa mun kan, o soppi kurkaadu yottinoowo mawdo sadaka on, o itti mo nowru ndun.

48 Onsay Iisaa wi'i: «Hidon ardi e kaafaaje e bedi fii nangugol lan wa si ko ngujjo arandon?

49 E hin-le mido wondi e mon jande woo ka *juulirde mawnde, mido janna, on nangaali lan. Kono d'un wadiri fii ko windanoo kon yo laato.»

50 Onsay be o wondunoo ben fow acci mo d'on, dogi.

51 Suka waaniido suddaare tun jokki mo, be nangi mo kanko kadi. **52** Kono o sortii, o acci d'on suddaare nden, o dogi, o bornaaki.

*Fii no Iisaa Addiraa Yeeso Hooreebé Diina ben
(Mat. 26.57-68; Luk. 22.54, 22.63-71; Yhn. 18.12-14, 18.19-24)*

53 Onsay be nabi Iisaa ka yottinoowo mawdo sadaka on, ka hooreebé yottinoobe sadaka ben e mawbe ñen e jannoobe fii Sariya on ben fow mottondiri d'on. **54** Tawi Petruusu no iwtiri baawo makko ka wodditii haa ka nder tata yottinoowo mawdo sadaka on, o jooododi e aynoobe ben, tawi himo iwlaade ka binde yiite.

55 Tawi hooreebé yottinoobe sadaka ben e dental fewjoobe ben fow no ñaabba seedeeji e hoore Iisaa fii no be warira mo, kono laatii be hebaali. **56** Ko fii hari ñuudube no seeditoo

penaale e hoore makko, kono tawi seedeeji mab̄be d̄in yaadaa.

⁵⁷ Kono wob̄be immii, seeditii fenaande e hoore makko, tawi hibe wi'a: ⁵⁸ «Men nanii himo wi'a o lancay ndee juulirde mawnde darniraande juude yimbe, o darnaa wonnde goo e nder balde tati, nde tawata hinaa darniraande juude yimbe.» ⁵⁹ Tawi hay e hoore d̄un seedee mab̄be on yaadaa.

⁶⁰ Onsay yottinoowo mawdo sadaka on immii ka hakkunde dental, o landii Iisaa, o wi'i: «A jaabotaako hay huunde e ko bee woni seeditaade e hoore maa kon?» ⁶¹ Kono Iisaa fanki, o jaabaaki hay huunde.

Yottinoowo mawdo sadaka on landii mo kadi, wi'i: «E hara ko an woni *Almasiihu on, d̄un ko *Bids̄o Alla Jom Barki on?»

⁶² Iisaa jaabii, wi'i: «Ko min. On yi'ay kadi Bii-Aaden on no joodii ka sengo naamo Jom Bawgal on, no arda e duule iwrude ka kammu.»

⁶³ Onsay yottinoowo mawdo sadaka on seeki conci mun d̄in, wi'i: «Ko seedeeji hondi kadi faaladen? ⁶⁴ On nanii hoyre makko nden. Ko hondun fottandon e d̄un?»

Fow happirani mo foddugol e mayde. ⁶⁵ Wob̄be woni e tuttugol mo, e buumugol mo yeeso ngon, e uttagol mo e hoore hibe wi'a mo: «Hotto!». Aynoofe ben kadi jab̄bori mo bante.

*Fii no Petruusu Yeddiri fi Iisaa
(Mat. 26.69-75; Luk. 22.54-62; Yhn. 18.15-18,
25-27)*

66 Fewndo ko Petruusu joodii ley ka nder tata, godđo e rewbe kurkaaduube ka yottinoowo mawdo sadaka on ari. **67** O yi'i Petruusu ka iwlotoo, o tenyini mo, o wi'i mo: «An kadi, hida wondunoo e Iisaa, oo jeyaado Naasirata.»

68 O yeddi e hoore himo wi'a: «Mi andaa, mi faamaali ko hondun wondaa wi'ude.» O yalti, o yaari ka ley jimbe, tun ndontoori ndin yoggi.

69 On debbo kurkaadujo ndaari mo, wi'i wonnoobe don ben kadi: «Oo ko tawdaado e mabbe.» **70** O yeddi kadi.

Bay nettii seeda, wonnoobe don ben wi'i Petruusu: «Ko haqiiqa, an ko a godđo e mabbe. Ko fii ko mo a Jaliilu.»

71 Onsay o woni e huditagol woonda, wi'a: «Mi andaa oo nedđo mo wondon wowlude fii mun!» **72** Tun ka dimmun ndontoori ndin yoggi. Petruusu anditi kisan kongol ngol Iisaa wi'unoo mo ngol: «Ado ndonto yoggude laabi fidfi, haray a yeddii fii an laabi tati.» Onsay o ugginii o wulli.

15

*Fii no Iisaa Nabiraa ka Pilaatu
(Mat. 27.1-2, 11-26; Luk. 23.1-7, 13-25; Yhn. 18.28-40)*

1 Bay weetii, hooreebe *yottinoobe sadaka ben e mawbe ben e jannoobe fii Sariya on ben e dental fewjoobe ben fow yewtidani. Be habbi Iisaa, be nabi mo, be watti e juude Pilaatu. **2** Pilaatu landii mo, wi'i: «Hara ko an woni lando Yahuudiyanke'en?»

Iisaa jaabii mo: «Ko wano wi'irdaa non.»

³ Tawi hooreebe yottinoobe sadaka ben no libi toope duudude e hoore makko. ⁴ Pilaatu landitii mo kadi, wi'i: «A jaabotaako hay huunde? A nanii dee tooje de be woni libude e hoore maa fow?»

⁵ Kono Iisaa jaabaaki hay huunde e mun. Dun naldini Pilaatu.

⁶ Tawi juldeere kala, o accitanay be kasoojo gooto mo be torinoo mo fii mun woo. ⁷ Hari goddo no wi'ee Barabaasi no ka kaso, wondude e wadunoobe gere, e nder gere on be itti hoore. ⁸ Onsay jamaa on yawi tawoyi Pilaatu, be woni e toragol mo, wi'a yo o wadan be ko woowani be kon.

⁹ Pilaatu jaabii be, wi'i: «Hara hidon yidi yo mi accitan on lando Yahuudiyanke'en?» ¹⁰ Ko fii hari himo andunoo ko sabu nawliigu wadi si hooreebe yottinoobe sadaka ben wadiri mo e joge. ¹¹ Kono hooreebe yottinoobe sadaka ben yuuni jamaa on fii yo Pilaatu accitan be Barabaasi.

¹² Pilaatu yetti kadi haala kan, o wi'i be: «Ko hondun non faaladon yo mi wadu oo mo wi'oton lando Yahuudiyankeeben?»

¹³ Be ewnii kadi, be wi'i: «Fempee mo!»

¹⁴ Pilaatu wi'i be kadi: «E hara ko hondun oo bonni?»

Be burti kadi sonkude, ewnoo, wi'a: «Fempee mo!»

¹⁵ Nde tawnoo Pilaatu no faalaa weltinde jamaa on, o accitani be Barabaasi. Bay wonii Iisaa gaynaama focceede, kanko Pilaatu o wattii mo e juude mabbe fii yo o fempe.

*Fii no Suufaaabe ben Wadiri Jalnori e hoore
Iisaa*

(Mat. 27.27-31; Yhn. 19.2-3)

¹⁶ Onsay suufaaabe ben naadi Iisaa ka nder tata, e maanaa ka nder suudu laamu. Be nodditi dental suufaaabe ben fow, ¹⁷ be borni mo dolokke bodeejo,s be wadi ka hoore makko katanwol bulle saccangol. ¹⁸ E hoore dfun, be woni e hiwragol mo, wi'a: «Salminaango e maa, yaa an Lando Yahuudiyankeebe!» ¹⁹ Be tappiri mo kadi kalinwol ka hoore, be tutti mo, be jiccii, be sujjinkinanii mo. ²⁰ Bay wonii be gaynii mo wadude jalnori, be borti mo dolokke bodeejo on, be borni mo conci makko din, be nabi mo fii femployegol.

Fii no Iisaa Wariraa

(Mat. 27.32-44; Luk. 23.26-43; Yhn. 19.17-27)

²¹ Tawi goddo no wi'ee Sim'uunu mo Sirenii no iwaynoo ngesa, rewi dson. Tawi ko on woni ben Aleksander e Rufuusa. Be karhi mo nabugol *leggal Iisaa altindiraangal ngal. ²² Onsay be nabi Iisaa e ndee nokkuure wi'eteende Golgota, ko woni firo dfun ko «Nokkuure Laalagal Hoore». ²³ Be okkori mo njaram jillaadfan *mirri, kono laatii o jabaali dan yarude. ²⁴ Onsay be fempi mo. Be sendiri conci makko din urbat fii andugol mo kala ko gasata hendaade.

²⁵ Wa ko be fempata mo, tawi ko e walluhaa on. ²⁶ Hari dfundoo no windii fii ko o happiranaa kon: «Ko lando Yahuudiyanke'en.» ²⁷ Tawi wuybe dido no fempidaa e makko, goddo on

s 15:17 15.17 Ko dolokke bodeejo lando on bornotonoo.

t 15:24 15.24 Zab. 22.19

ka sengo makko jaamo, oya on ka nano makko.
28 Ko nii ko bindi din wi'unoo kon laatori, wonde:
 «O wattidete e bonbe ben.»^u **29** Tawi feyyoobe
 ben no hoyna mo, hayla hoore, wi'a: «Hey, an
 oo wi'unoodo lancay *juulirde mawnde nden,
 darnita nde e nder balde tati, **30** awa dandito an
 tigi, tippodaa ka leggal altindiraangal don!»

31 Tawi hooreebe yottinoobe sadaka ben e
 jannoobe fii Sariya on ben kadi no jalaynoo mo
 hakkunde mabbe, wi'a: «O dandii beya, kono
 o waawataa dandude hoore makko! **32** Si ko
 o *Almasiihu on, cfun ko lando *Isra'iila'en, yo
 o jippo ka leggal altindiraangal, yi'en, cfun en
 gomdfinay mo!» Tawi fempidaabe e makko ben
 kadi no hoynaynoo mo.

Fii Mayde Iisaa nden

(Mat. 27.45-56; Luk. 23.44-49; Yhn. 19.28-30)

33 Gila naange e hoore, niwre wadi e leydi
 ndin fow haa ka baawo fanaa. **34** Wa fewndo ka
 baawo fanaa, Iisaa ewnii ko tiidi, o wi'i: «Iilooyi,
 Iilooyi, lama sabaxtanii?»^w. (Dun no firi: Alla
 an, Alla an, ko fii honfunkertanidaa mi?)

35 Wobbe e wonnoobe don ben nani ko o wi'i
 kon, be wi'i: «On nanii, o noddii Iiliiya!»

36 Tun goddo e mabbe dogi, yettoyi linsere, o
 bussbini nde haa nde loppii ndiyam lammudan, o
 wadi nde e tuggordu, o townani mo fii yo o yaru,
 e hoore himo wi'a: «Accee, ndaaren si Iiliya
 aray, tippina mo.»

37 Iisaa ewnii ko tiidi, onsay o timmi.

³⁸ Wirngallo* ngon ka juulirde mawnde seekii, woni pecce didi, gila dow haa ley. ³⁹ Bay hooreejo suufaaabe wonnoodo yeeso makko kanko Iisaa on yi'ii no o timmiri non, o wi'i: «Ka haqiiqa, hari oo neddo ko *Biddo Alla!»

⁴⁰ Tawi rewbe kadi no ka woddfitii, no ndaara. Tawi no tawdaa e mabbe Mariyama jeyaado Magaduuna e Mariyama yumma Yaaquuba tosooko on e Yuusufu, e Saliimatu. ⁴¹ Tawi ko ben jokkunoo mo kanko Iisaa, no kurkanoo mo wa fewndo ko o wonnoodo Jaliilu, e dhuudube goo kadi be o yaadunoo Yerusalem.

Fii no Iisaa Surriaraa

(Mat. 27.57-61; Luk. 23.50-56; Yhn. 19.38-42)

⁴² Hawrondiri nibpii, tawi ko hebulanagol *jalaande fowteteende nden. ⁴³ Onsay oo wi'eteedo Yuusufu hewti. On ko hooloraado goo e ngal dental maabbe, on ko jeyaado Raamati, tawi on kajun tigi ko *laamu Alla ngun o tijji. O hebi cuucal yahugol ka Pilaatu, toroo mo hettugol furee Iisaa on. ⁴⁴ Pilaatu naldii ko tawi o maayii kon. O noddi hooreejo suufaaabe ben, o landii mo si tawii o maayiino. ⁴⁵ Bay hooreejo on humpitii mo d'un, o jonniti Yuusufu furee Iisaa on. ⁴⁶ Kanko Yuusufu o soodoyi kasannge, o tippini furee Iisaa on ka hoore leggal, o tumbi e kasannge, o belnoyi mo e qaburu asaado e feto. O talli hayre, o wadi ka dambugal qaburu. ⁴⁷ Tawi Mariyama jeyaado Magaduuna e Mariyama yumma Yuusufu no ndaara ka o belniraa.

16

*Fii Ummatal Iisaa Almasiihu on
(Mat. 28.1-8; Luk. 24.1-12; Yhn. 20.1-10)*

¹ Bay *jalaande fowteteende nden feyyii, dfun ko aseweere nden, Mariyama jeyaado Magaduuna e Mariyama yumma Yaaquuba, e Saliimatu soodi tiiri fii ko be fulla e furee Iisaa on. ² E alat, dfun ko nallal aranal e nder yontere nden, ñen rewbe dawi bimbi subaka ka yenaande, dfun ko ka pudsal naange. ³ Tawi hibe wi'indira: «Taw ko hombo tallanta en hayre wonde nden ka dambugal yenaande nden?» ⁴ Tun be ñanti gite, be haynii, be tawi nden hayre njannde tallaama. ⁵ Be naati ka nder yenaande, be yi'i suka gorko, no bornii daneeji, no joodori ka sengo jaamo. Be ñaldfi, be huli.

⁶ On wi'i be: «Wota on hulu! Iisaa oo jeyaado Naasirata, fempaado on, mo wondon ñaabßitude on, immitike, o alaa doo. E hino nokkuure ka o belnanoo dfon. ⁷ Awa yahee andinoyon taalibaaße makko ñen e Petruusu, o adoyto on Jalilu. Ko ton yi'oyton mo, wano o wiirunoo on non.»

⁸ Onsay be dogi be yalti ka yenaande ko fii hari diwnol e kaawee hebii be. Kono laatii be wowlanaali hay gooto huunde, ko fii hari hibe huli.

*Fii no Iisaa Feepirani Sahaabaabe ñen Sappoo
e Go'o*
(Mat. 28.9-10; Yhn. 20.11-18)

⁹ Bay Iisaa immitike e jalaande aranere nden e nder yontere nden bimbi, ko o adii hollitaade ko Mariyama jeyaado Magaduuna, on mo o

yaltinnoo jinnaaji jeedidi e mun. ¹⁰ On yahi, o banginanoyi d'un be Iisaa wondunoo ben, tawi ben no yoomi, no wulla. ¹¹ Bay be nanii wonde himo wuuri, awa kadi kanko debbo on o yi'ii mo, laatii be hoolaaki mo.

¹² Bawto d'un, tawi dido e mabbe no e hoore laawol, no yahaynoo e fulawaa, kanko Iisaa o feenirani be noone goo. ¹³ Ben kadi arti, holiti d'un beya, laatii be hoolaaki ben kadi. ¹⁴ Ka sakkitorun o feepani sappoo e go'oobe ben, wa fewndo ko be joodii fii jaamugol, o feli be sabu angal gomdfinal mabbe ngal e cattal berde mabbe den, fii ko be hoolaaki yi'unoobe mo ben kon bawto o immintineede.

¹⁵ E hoore d'un o wi'i be: «Yahee e aduna on fow, fejjinanon taggeefo ngon fow Kibaaru Moyyo on. ¹⁶ Kala on gomdfindo, *lootaa maande kisiyee, dandoyte, kono kala on mo gomdfinaali, happante. ¹⁷ E hino maandeeji wondaydi e ben gomdfinbe: e innde an be radoyto jinnaaji din, be wowla kadi e *haalaaji goo, ¹⁸ be nanga bolle, si be yaru kadi njaram waroojan, d'un masinbinta be. Si be *fawoyii kadi juude mabbe den e hoore nawnube ben, ben ndikkay.»

¹⁹ Bay Iisaa Joomi on gaynii be yewtude, o yentinaa ka kammu, o joodori ka sengo jaamo Alla. ²⁰ Kambe kadi be yahi, be waajoyii hen fow, tawi Joomiraado on no gollidude e mabbe, o haqinqiniri daalol ngol maandeeji di ngol wondunoo din.

**Version Pular Fuuta-Jallon
The New Testament in the Fouta-Jallon Pular
language of Guinea**

copyright © 2010 Pioneer Bible Translators

Language: Pular

Translation by: Traducteurs Pionniers de la Bible

Contributor: Pioneer Bible Translators

This translation, published by Pioneer Bible Translators, was published in 2011.

If you are interested in obtaining a printed copy, please contact wab.admin@pbt.org.

The translation was completed in collaboration with Christian Reformed World Mission.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-02-06

PDF generated using Haiola and XeLaTeX on 11 Nov 2022 from source files dated 29 Jan 2022

024b8126-79ef-5039-bc54-7d61889f8ae6